

清

史

稿

馬會伯

從兄伯齡伯

路振揚

韓良輔

子勳良輔

楊天縱

王郡

宋愛

馬會伯陝西寧夏人康熙三十九年一甲一名武進士授頭等侍衛四十五年授直隸昌平參將累遷雲南永北總兵五十九年師入西藏命會伯與總兵趙坤率綠旗兵會都統法喇從征西藏定敘功加左都督雍正元年入覲世宗書榜資焉曰有儒將風並賜貂冠孔雀翎其從弟觀伯以山西大同總兵率師駐山丹衛命會伯代鎮賜白金五百二年還鎮永北三年擢貴州提督疏言貴州土瘠兵貧臣捐穀千石所屬四營將備捐千石貯以濟兵來歲續捐增貯上善之初廣順屬長寨種苗最悍總督高其倬奏移兵設汛是歲建營房種苗出阻會伯會總兵石禮哈率兵捕治得其酋阿革阿紀及川販爲主謀者李奇悉誅之餘衆詣軍前聽命會伯復赴宗角者貢谷隆關羊城壘諸地督建營房得旨

嘉獎四年調甘肅未至又調署四川旋授四川巡撫五年疏劾按察使程如絲營私網利遣侍郎黃炳按鞫得實論罪如律會伯疏言四川巡撫舊有稅規耗銀三萬九千有奇令併入正項富順鹽規一萬有奇令改增引課仍留丁糧鹽茶耗規等一萬七千有奇爲巡撫養廉及犒賞之用報聞又疏請清察隱糧爭控田地按名丈量四川清丈自此起調湖北疏請整飭庶獄重校刻洗冤錄頒發州縣議如所請七年命往肅州督西路軍需並權肅州總兵上諭之曰此任朕屢經斟酌用滿員恐與岳鍾琪掣肘用文吏則能諳軍機實心任事者甚少委託於汝慎毋負任用尋擢兵部尙書仍督兵需並領肅州總兵如故八年上責會伯貽誤奪職仍署總兵効力乾隆元年卒際伯會伯從兄初入伍從勇略將軍趙良棟討吳三桂復略陽敗敵陽平關下四川奪小關山克建昌遂定雲南敘功授千總累加參將銜又從振武將軍孫思克征噶爾丹破敵昭莫多敘功加副將銜康熙三十六年授甯夏鎮標前營游擊從總兵殷化行擊噶爾丹至洪敦羅阿濟爾罕累遷四川建昌總兵遭母喪巡撫能泰請留任上命在任

守制四十六年入覲調西甯賜孔雀翎鞍馬五十年授四川提督卒贈右都督
賜祭塋諡襄毅見伯際伯弟康熙三十年武進士洪敦羅阿濟爾罕之役見伯
在行敘功授守備累遷山西太原總兵上西巡賜貂褂蟒袍母喪並命在任守
制上復西巡賜孔雀翎上命弁兵內通曉文義者得應武鄉會試見伯疏言武
經七書註解互異請敕儒臣選定下部議駁上諭曰見伯此奏亦是武經七書
文義駁雜朕曾躬歷行間知用兵之道七書所言安可盡用耶命再議乃議武
試論二一以論語孟子命題一以孫子吳子司馬法命題見伯並請祭孔子副
將以下皆陪祭上特允之旋調天津五十八年擢陝西固原提督五十九年上
命貝子延信爲平逆將軍率兵定西藏以見伯參贊軍務屢破敵師還次打箭
爐卒賜祭塋覲伯見伯弟康熙四十二年武進士選三等待衛授巡捕南營參
將累遷大同總兵策妄阿喇布坦侵哈密覲伯率師出駐推河雍正元年入覲
賜孔雀翎命移軍駐山丹衛二年還鎮三年上諭之曰爾前入見朕命爾受巡
撫諾岷教導近聞爾等俱聽年羹堯指抑此甚非是嗣後諸事當商請署巡撫

伊都立尋追議在軍時因事與將軍爭競奪官命轄鄂爾坤圖拉屯川五年獻瑞麥一莖十五穗上諭曰今歲各省產嘉禾覲伯復獻瑞麥帝王本不以祥瑞爲尙恐有司借端粉飾致旱潦不以上聞雍正五年以後各省產嘉禾停其進獻乾隆元年卒

路振揚陝西長安人初入伍拔補把總累遷漢中副將康熙五十一年擢四川松潘總兵五十六年策旺阿喇布坦侵西藏命四川提督康泰率兵往青海禦之至黃勝關柏木橋兵譁潰振揚往鎮撫事定以振揚署提督疏言松潘迤南雜谷土司種繁俗悍土司良爾吉子班第爾吉臣密令防隘頗稱勤順請襲職並予賞賚又加渴瓦寺安撫土司桑郎溫愷募衆運糧漳臘營轄旗命上下包坐司土兵習戰鬪諳邊情臣令備兵候調咸知踴躍亦請予賞賚皆如所請雍正元年調重慶總兵四年遷陝西固原提督疏言國家設祿以養廉立法以懲貪例定以財行賕及說事過錢人審實計贓同科罪未發而自首者免罪猶徵正賊竊思官吏營私彼此容隱不易收賂或有告發猶必互相掩飾臣請開自

首之路凡上司保題屬吏並大計軍政卓異薦舉人員以財行求彼此皆應治罪如受者自首免追贓及應得之罪如與者自首則照原贓倍追給主亦免應得之罪或說事過錢人自首免罪給賞如是庶彼此皆存顧慮未事則畏懼不敢爲既事則爭首惟恐後是或除貪之一法奏入上嘉之曰向聞振揚操守廉潔今覽此奏非一塵不染者不敢言也下部議行並命優敘六年上念振揚老召詣京師授兵部尙書振揚以病固辭上疑其憊外任懷怨望命停俸旋改鑾儀使八年署直隸古北口提督九年上以古北口宣化大同沿邊要地當增兵獨石口西至殺虎口當增兵並修邊牆敕御史舒喜天津總兵補熙會振揚詳勘振揚等奏請改設副將以下官增兵千四百有奇於各鎮營抽撥邊牆傾圮用木柵鹿角堵塞從之乾隆元年回鑾儀使任旋卒賜祭葬

韓良輔字翼公陝西甘州人父成字君輔康熙中官重慶總兵在任十七年有威惠民德之卒祀名宦祠葬合州遂入籍重慶良輔多力有膽氣年十五卽隨父殺賊補縣學生員棄去肄武康熙二十九年中式武舉第一三十年成一甲

三名進士選二等侍衛出爲陝西延綏游擊遼宜君參將境多盜有爲之主者捕得必連坐又多虎造虎槍教士卒刺虎法殺虎百餘患遂息遼神木副將調直隸大名又移石匣五十九年率古北口兵五百赴西寧軍前聽調遣雍正元年遷天津總兵賜孔雀翎授廣西提督廣西多山林宜藤牌挑刀良輔令步兵弓箭軟弱者皆改肆牌刀並增製軍械買馬以壯易羸二年署廣西巡撫奏言廣西土曠人稀多棄地其故有六山谿險峻犛獞雜處田距村遠穀熟慮盜割一也民樸憊但取濱江及山水自然之利不知陂渠塘堰可資蓄洩二也不得高卑宜植糧種三也不知耕耨四也所出祇米穀納賦必用銀且徭隨糧起恐貽後累五也良懼墾熟豪猾勢佔六也宜選大員督率守令度地居民立茅舍貸牛種興陂渠塘堰嚴冒佔之禁寬催科之期使民知有利無害皆奮興從事邊徼可成樂土上命李紱爲巡撫令良輔協同料理三年良輔以天河二曠犛獞時出劫掠檄柳慶副將孫士魁率兵捕治並曉以利害上曠莫旺東等中曠賈貴翁來下曠覃明甲等皆出降師還復撫定宜山屬那隘三岔諸寨四年復

署巡撫遭嫡母喪命在任守制五年實授巡撫疏言廣西撫提鎮三標歲需兵糧七萬六千石有奇各屬額徵糧數有無多寡不同撥運供支有司既苦繁費兵士又虞乏食請酌水道遠近糧額多少勻給撥運並多徵折色以給舟楫不通之地下部議行上命紱以待郎奉使與良輔赴貴州安籠與總督鄂爾泰議分界事畢還廣西坐前官提督奉議土民羅文剛抗阻設汛未早捕治奪官七年卒良輔既以兵略顯子弟多肆武季弟良卿長子勳尤知名良卿字省月康熙五十一年武進士授侍衛出爲陝西西甯守備再遷莊浪參將師討謝爾蘇部土番從涼州總兵楊盡信擊敵碁子山功多賜孔雀翎賚白金千累遷甯夏中衛副將廣西碣石總兵移肅州乾隆五年擢甘肅提督卒賜祭葬諡勤毅勳字建侯年十九中式武舉康熙五十六年祖成請効力命在內廷行走五十九年師征西藏勳隨良輔赴噶斯應援雍正元年授三等侍衛出爲貴州威遠游擊未赴改鎮遠五年從提督楊天縱擊仲苗遷雲南鎮雄參將八年烏蒙獮爲亂援鎮雄永善總督鄂爾泰令分兵三道進攻令提督張耀祖總兵哈元生各

出一路而以勦將四百人出鎮雄奎鄉進次莫都都裸數千出拒力戰一晝夜殺二百餘破寨四翌日裸復犯奎鄉勦擊之戰三日殺二千餘盡焚其寨時元生已克烏蒙裸屯魯甸拒大關以守耀祖軍次東川不進鄂爾泰復檄勦自鎮雄夾攻循途搜斬破寨百餘克發烏關至黃水河環攻敵壘大破之克大關小關鎮雄永善相繼下捷聞上諭曰參將韓勦領兵四百破賊數千以寡敵衆鼓三軍之氣喪賊人之膽較諸路爲獨先命優敘超擢貴州安籠總兵九年移古州討定稿平苗十三年疏言古州苗寨接壤郡縣請視湖廣例得與內地兵民聯姻庶彼此咸喻習知禮義可底善良從之清江諸苗犯王嶺汛勦率兵擊之苗退踞台拱勢猶熾率副將王海截擊破烏公八妹諸寨進屯朗洞乾隆元年從經略張廣泗進攻牛皮大箐自朗洞旋師途燬二十餘寨三年按治定番州姑盧等寨苗四年疏言古州西北地名滾縱臨容江接牛皮大箐實爲要隘當設兵防守允其請六年粵猪挾黎平黑洞苗入境焚劫擊走之禽其首惡石金元等寘之法擢貴州提督八年卒贈右都督賜祭葬諡果壯

楊天縱字景聖陝西渭南人年十七父母相繼沒遂入伍嘗從勇略將軍趙良棟下雲南冒矢石負重創補四川提標把總邊戍邊營千總康熙三十九年打箭爐西藏營官喋吧昌側集烈爲亂天縱從提督唐希順討之易服入敵中數往返希順用其言爲攻取計四十年攻二道水磨岡磨西面諸地爭先摧敵克打箭爐敘功加游擊銜授浙江處州都司三遷署山東沂州副將五十七年授貴州定廣副將入覲上命加總兵銜留沂州任山東鹽梟勢張甚天縱按行各汛行至費縣聞有聲自遠至勢且數百人正夕天縱令從騎伏路旁俟其近驟出擊之皆驚潰逐之及於柱子村擒其渠俘數百又擊之於蒙陰於泰安餘衆悉解散五十九年調廣東雷州副將山東巡撫李樹德以沂州險要請仍留任許之加都督僉事雍正元年遷雲南臨元總兵魯魁標夷方景明等恃衆據險恆出掠天縱偕布政使李衛率兵捕治悉殲焉四年授貴州提督五年疏言各省考察軍政所劾多千總把總至一二十員不等千把總雖微員有防汛護餉解逃捕盜之責如有偷惰應不時斥革何待此時蓋緣提鎮以是塞責且有所

劾即有所擢祇圖可得錙銖上負君恩下屈末弁請敕提鎮嗣後千把總有劣員即時斥革上韙之諭兵部著爲令總督鄂爾泰討平長寨狎苗瓊其地東西南皆生苗獷悍不受約束內地狎苗以爲通逃數天縱從鄂爾泰招撫遣參將劉成謨率熟苗頭人推誠勸諭生苗有求見令薙髮予以衣冠酒食使轉相化導受撫者百四十八寨五千六百餘口敘功予拖沙喇哈番世職巡撫張廣泗清理苗疆丹江苗糾衆抗拒天縱遣兵助勦疏言舊存大礮過重餘礮力不及遠臣以己意製礮大者曰靖蠻大礮能及數里小者曰過山鳥攻遠便捷選兵送廣泗行營聽用並調安籠安南大定黔西長寨諸營兵攜礮赴凱里一路分布進攻上嘉天縱料理合宜七年疏劾前署巡撫祖秉圭不諳事機廣泗未至日在教場閱操言將盡勦諸苗以致頑苗抗拒勞師動衆臣不敢隱諱上諭曰生苗必經此懲創方可久安朕以祖秉圭不勝任已予罷退此類情事焉能逃朕鑒察耶九年以老致仕加太子太保十年請改籍四川成都旋卒賜祭葬諡襄壯

王郡陝西乾州人康熙三十年陝西饑就食福建以李姓入伍補臺灣鎮標把總遷延平城守千總六十年臺灣民朱一貴爲亂總督滿保檄郡赴援自廈門渡海一晝夜至淡水佐守備陳策固守與策安集民番師至諸羅往會從克臺灣二歲中四遷雍正元年擢浙江嚴州副將奏復姓尋又遷江西南贛總兵六年調臺灣九年以上以郡在臺灣三年任滿例當調內地命總督劉世明選代郡者世明舉海壇總兵呂瑞麟令赴臺灣就郡諮度兵民風土乃調郡潮州十年擢福建提督臺灣北路社番爲亂瑞麟與臺灣道劉象愷往剿郡赴臺灣鎮撫南路亂渠吳福生等竊發郡率兵於虎頭山亦山碑頭諸地逐捕擒福生餘黨悉平加都督同知尋北路大甲西沙轆牛罵諸社番殺掠兵民郡自鹿仔港偵知阿東一社有北崙西崙東崙惡馬諸地爲亂番所聚令游擊邱有章李科等攻西崙參將李蔭樾游擊林黃彩等攻東崙惡馬而游擊黃貴守備蔡彬蔡榮等攻北崙亂番設伏拒我師督兵奮擊悉討平之加左都督十一年調水師提督十二年疏言廈門環海地少人多需米不貲加以營兵赴糴難免匱乏水師

提督公廨舊有官房魚池賃於民歲得息五千餘請買穀貸於兵俟穀熟買補數年內可得數萬石孤島兵民庶無虞艱食上諭曰郡將應得租息籌濟兵食甚可嘉也命議敘尋入覲途次遘疾遣太醫診視賜藥餌二子守乾守坤隨侍召入見賜守乾守備銜守坤戶部主事乾隆元年復入覲賜鞍馬弓矢時部議許民間得製烏槍防盜郡言臺灣遠在海表番漢雜處禁例一開恐火器充斥小則侵界擾番大則偶遇水旱羣不逞藉以爲亂臺灣民居多平衍山箐中皆生番各險要皆置兵戍守民間不需烏槍懇仍舊例禁止從之十一年請老加太子少保食全俸二十一年卒於家賜祭葬諡勤愍守乾官至南昌總兵

宋愛字體仁陝西靖遠人父可進雍正初以京營參將從撫遠大將軍年羹堯討羅卜藏丹津敵攻鎮海堡遣赴援擊殺六百餘人敵敗走敵又攻西甯南川口圍申中堡復遣赴援堡兵出夾擊敵敗走擢副將從提督岳鍾琪攻郭隆寺燬寨七焚其屋宇七十餘所旋與鍾琪分道深入定青海擢涼州總兵授三等阿達哈哈番世職復從鍾琪攻謝爾蘇土番戰桌子山圍之七晝夜一日數接

戰可進受重創奮進破其巢遂討平之擢甘州提督愛雍正元年武進士授三等侍衛二年命省可進軍中桌子山之戰愛從可進奮戰有功河南河北總兵紀成斌請以愛授河南開封都司上疑成斌受夔堯指允其請即令愛傳諭詰成斌成斌奏開封都司省會重地去年勦桌子山親見愛奮不顧身極有膽氣且代可進料理營務頗有才幹知其能勝任故冒昧陳請臣實未受何人屬託即可進亦不過同在軍中相識素無交情上諭之曰朕原不過揣度之辭近年年羹堯握兵柄若爾等蔑國恩重私誼甚非朕保全功臣之意今既無別故意在爲地得人朕甚嘉賞再遷浙江紹興副將命署總兵歷南陽永州天津定海諸鎮乾隆六年擢襄陽總兵七年調安籠十年貴州總督張廣泗奏言古州新闢苗疆諸鎮中惟愛詳慎周密年力正壯請以調補上從之丁母憂命暫署服闋後員除十八年擢貴州提督前提督丁士傑奏言古州苗因公役使不從恐激成驕抗諭將吏彈壓愛奏古州苗於應備夫役一呼卽至初未見遲延所屬新疆苗民亦不至驕抗苗性難馴惟在有司善於約束平時不煩苛有事不姑

息務使懷德兼知畏法上褒勉之十九年總督碩色劾愛馬政廢弛又爲故鎮遠總兵吳三傑劾資治喪會愛卒寢其奏

論曰雍正間文武多通用高其位以提督巡授大學士爲最著會伯振揚皆長兵部然會伯未上官振揚不久改右班其績仍在專閫良輔爲疆吏卓卓有建白家世出將與會伯略同天縱郡凱等弭亂綏氓因事有功年羹堯部將如宋可進黃喜林吳正安周瑛王嵩馬忠孝岳鍾琪部將如紀成斌曹勦張元佐皆相從轉戰惟可進以有子愛名字猶可見他皆不具始末成斌勦且以微罪死是亦重可哀已

清史稿

列傳八十七

沈起元

何師儉

唐繼祖

馬維翰

余甸

王葉滋

劉而位

沈起元字子大江南太倉人康熙六十年進士選庶吉士改吏部主事擢員外郎以知府發福建用總督高其倬令權福州調興化時世宗聞福建倉穀虧空遣廣東巡撫楊文乾等往按被劾者半受代者爭爲煩苛起元獨持平苗民因訟互鬪其倬恐釀亂令捕治起元責兩人而釋其餘報曰罪在主者餘不足問也尋攝海關裁陋規萬餘金巡撫常安有奴在關以索費困商船起元聞立督收稅如額令商船行自常安斥奴自是人皆奉法其倬奏開南洋報可已復令商出洋者必戚里具狀限期返諭者連坐起元曰人之生死貨之利鈍皆無常戚里豈能預料且始不聽出洋則已今聽之商造船集貨費不貲奈何忽撓

以結狀若令商自具狀過三年不歸勿聽回籍不猶愈乎其倬從之調臺灣臺
灣田一甲準十一畝有奇賦三則上則一甲穀八石中則六石下則四石視內
地數倍然多隱占民不甚困時方清丈占者不得匿其倬欲使臺灣賦悉視內
地下則恐不及額致部詰起元令著籍者仍舊額丈出者視內地下則俟隱占
既清更減舊額重者均於新額賦不虧而民無累起元在福州以辨冤獄忤按
察使潘體豐體豐中以他事鐫四級遂告歸高宗即位起江西驛鹽道副使乾
隆二年擢河南按察使會久雨被災者四十餘縣饑民四走或議禁之起元謂
民飢且死奈何止其他徒令安置未被水諸縣給以糧遂無出河南境者巡撫
雅爾圖檄府縣修書院以起元總其事乃教群士省身克己之學立章善坊書
孝子悌弟義夫貞婦名採訪事實爲章善錄版行一時風動七年遷直隸布政
使大旱議賑總督高斌欲十一月始行起元力請先普賑一月俟戶口查竣再
分別加賑有倡言賑戶不賑口者起元曰一戶數口止賑一二是且殺七八人
矣檄各屬似此者罪之戶部尙書海望奏清理直隸旗地有司違限旨飭責斌

將劾數州縣應命起元不可曰旗地非旦夕可清州縣方賑災何暇及此獨劾起元可也乃止九年內轉光祿寺卿十三年移疾歸起元自少敦厲廉恥晚歲杜門誦先儒書臨沒言平生學無負得年來靜中自檢仰不愧俯不作或庶幾焉

何師儉字桐叔浙江山陰人以納貲於康熙六十年選授兵部員外郎奉職勤懇常數月不出署雍正元年遷廣西右江道僉事部請留任一年世宗命以升銜留任賜人獲貂皮師儉以執法卻重賄忤要人因誣以避瘴故留部侍郎李紱昌言曰今部曹不名一錢才者尤勞瘁苟得郡爭趨之況監司耶期滿復請留加按察司副使銜司疏奏皆出其手他司事難治者亦時委之三年出爲江南驛鹽道副使上召對勉以操守復賜人獲貂皮許上疏言事四年調廣東糧驛道副使歲大校師儉以存留米五萬石給餉飭所屬緩徵或疑專擅獲咎師儉曰請而後行民已苦箠楚矣總督孔毓珣與巡撫楊文乾不相能以師儉署鹽法道欲引以爲助文乾疑爲毓珣黨令買銅將以賠累困之明年文乾入覲

上示以毓珣彈事亦及師儉乃知師儉非阿毓珣者令署按察使毓珣又疑師儉隄文乾及文乾卒劾師儉違禁開礦侵蝕銅價逾年署巡撫傅泰會鞠事始自上知其無罪命往陝西佐治軍需師儉在兵部諳悉諸邊形勢扼塞戰守機宜芻餉緩急至涼州每集議指畫如素習總督查耶阿深重之署涼莊道參政師過涼州檄至肅州支餉兩路遙遠師儉即以涼州所蓄給之師行無乏一日羽書數過師儉策必調取生兵峙銀以待已而果然肅州師將行飛檄令截取公私贏馬官民皇皇師儉曰在道官商皆赴肅者若官頓於途貨棄於地非軍前所宜進勦未有定期何如聽其至肅釋所載而後供役軍前得人與貨亦省芻茭解送之煩是獲兩利也檄雖嚴吾自富之於是官商皆安軍事亦無誤尋調補西安鹽驛道副使關中旱詔以湖廣米十萬石自商州龍駒寨運陝西師儉董其役未半大雨谿漲贏馬少不足供轉輸商於山中無頓積所水次隘運艘不齊師儉以秋穀將登請止運民亦不饑軍中馬缺檄取驛馬師儉謂置郵傳命如人身血脈不能一日廢拒不可事竟寢擢按察使數平疑獄吏有故入

人罪者必按如法雖貴勢賢親不徇縱十三年以目疾乞休高宗即位赦詔至時日已失明令吏誦案牘聽得邀赦典者立出之而後上陳留兩月畢其事始歸後卒於家陝西祀名宦

唐繼祖字序皇江南江都人康熙六十年進士選庶吉士雍正元年散館授編修轉禮部員外郎五年考選浙江道御史七年授工科給事中命察八旗虧帑律侵挪皆不赦犯者貧羈獄二三十年不結繼祖爲核減開除奏請豁免積贖一清命巡西城回民聚居頑犢不法嚴治之有犯必懲悉歛輯建倉東便門外多發冢墓毀祠宇繼祖陳其不便改地營建冢墓祠宇並修復南漕愆期命赴淮安巡視繼祖馳至不更張成法惟選幹吏催督懲其疲惰兩閱月糧艘悉抵通州條上漕務利病下部議行七年命往湖南獄並巡察湖南湖北兩省裹糧出有餽觴酒豆肉皆却之令行禁止與巡撫趙申喬同按永順苗變獄羣情帖服苗疆以安湖南捕役多通盜奏請捕役爲盜加重治罪報可入新例八年擢通政司參議九年擢鴻臚寺卿尋命以本銜署河南按察使旋授湖北按察

使繼祖在兩湖久熟知吏民情僞楚俗刁健黠吏與姦豪通伺官喜怒訟益難治繼祖閉諸胥於一室不令與外通訟風衰滅雪監利女子冤獄按鍾祥民變皆爲時所稱世宗取吏嚴內外大僚凜凜救過不暇繼祖一意展舒所陳奏無不允上欲大用之出巡察賜以摺匣許奏事曰朕於督撫賢者始賜摺匣汝宜好爲之調江西未之任以疾乞歸病愈將出遽卒

馬維翰字墨麟浙江海鹽人康熙六十年進士雍正元年授吏部主事甫視事杖姦胥銓政清肅轉員外郎考選陝西道御史遷工科給事中監督倉場所至有聲六年命赴四川清丈田畝時同奉使者四維翰分赴建昌道屬具有條理糧浮於田者必請減逾年事竣御史吳濤在川東丈田不實以維翰助之至則發其弊遂以維翰代任巡撫憲德荐可大用八年留補建昌道副使疏陳二事四川俗好訟州縣斷獄苟簡案牘不具姦民輒翻控淆亂是非請設幕職以襄治理又民鮮土著多結草屋輕於遷徙焚劫輒致災請發官款造磚甃勸民多建瓦屋上斥其非政要以其疏示憲德謂汝薦可大用者乃若此然維翰勇於

任事相度要害改黎州千戶所設清溪縣烏蒙苗亂出師會剿維翰治軍需供
糗糧芻蕘饗雪通道與厮卒同甘苦論剿撫悉中機宜事乃定涼山地震數百
里勘災散賑民感之鐵廠撥蠶起爲亂方進剿維翰力陳營兵不輯及各廠病
蠶狀請罷廠撤兵撫各番止誅其魁在川七年不阿上官旋被搆維翰揭部請
解職赴質時親王總部事特威重梓使免冠維翰以手按冠抗聲曰奉旨不免
冠譙問故則又抗聲曰旨解職非革職也部乃疏請奪官事旋白乾隆二年起
授江南常鎮道參議丁父憂歸卒於家

余甸字田生福建福清人康熙四十五年進士居鄉勵名節巡撫張伯行重之
延主旌峯書院授四川江津知縣民投牒者片言立決遣訟爲之簡日與諸生
誦說文藝疏解性理所徵賦即儲庫不入私室時青海用兵巡撫年羹堯督餉
多額外急徵檄再三至甸不應乃使僕持檄告諭自朝至晡甸不出使者譁甸
坐堂皇命反接將杖之丞簿力爲請久之乃釋其縛越日使者索檄甸曰汝還
報我閉門待劾檄已達京師矣羹堯亦置之行取吏部主事時尙書張鵬翮侍

郎湯右曾皆以餘濟名旬遇當爭辨者侃侃無所撓主選二年權要富人請託多格不行將告歸條文書已駁議未奏者十餘事曰此皆作姦巧法易爲所蒙必上聞吾乃去父憂免喪猶廬墓以河道總督陳鵬年疏薦擢山東兗甯道釐工剔弊一祛積習甚得士民心鵬年卒齊蘇勒爲河督以工事劾旬行河至濟甯士民羣聚乞還旬齊蘇勒疏陳召入見雍正二年四月授山東按察使攜二僕買驢之官務崇禮教輕刑罰政化大行十一月召詣京師三年擢順天府丞旬歷官盡革陋規爲按察使愍囚不能口衣食取鹽商歲饋三之一以資給之兼完固圉修學宮書院委有司出入注籍旣去官上命內閣學士繆沅清察山東鹽政諸弊舉是劾旬奪官歸旬用唐人詩語爲人書楹帖其人有怨家訐於有司以爲怨望有司以旬所書也并下旬於獄事白遽卒

王葉滋字槐青江南華亭人弱冠補諸生浙江巡撫朱軾辟佐幕器其才雍正元年重開明史館軾薦之引見稱旨命入館纂修舉順天鄉試福敏督湖廣世宗命葉滋往贊其幕五年應禮部試甫畢上召見問湖廣吏治民生利弊奏對

甚悉趣馳傳還湖廣榜發中式未與殿試賜二甲進士即授常德知府常德例知府至行戶更新照規費四千金葉滋革其例境數被水災請帑增築花貓新陂隄堰豁被水荒田額糧民德之辰州關木稅爲利藪時議移關常德葉滋恐累民拒之請仍舊制行法不避豪貴興學造士薦舉優行諸生陳悌爲武平知縣貴金馬爲上蔡知縣劉樵爲清平知縣並爲良吏署岳州辰州二府攝岳常道副使久之授辰沅靖道副使時苗疆初闢清林箐增汎堦規模肅然所屬綏甯城步與黔疆犬牙錯峙率數騎持酒肉鹽菸循行苗砦羣苗迎拜謂上官親我召諸頭人集校場賜花紅銀牌宣上德意勸以禮義因偕總兵閱兵耀軍容羣苗帖服署按察使調糧儲道舊有酒費悉歸公用值貴州苗亂師進剿葉滋駐辰州治軍需尅期辦綏甯苗蠢動爲貴州苗應葉滋條上剿撫事悉中竅要大吏令駐綏甯指揮積勞疾作卒於山中葉滋初以文學受知及官於外所至有聲績卒時年僅五十五世咸惜之

劉而位字爾爵山西汾陽人康熙五十二年舉人授河南安陽知縣有兄弟爭

產構訟十餘年者爲據理剖解至淚下皆叩頭求罷案牘遂稀雍正中遷福建泉州知府再遷興泉道參議鹽政竊敝商居奇案高直民苦淡食不獲已增價以市旣而鹽不足民惡其壟斷聚而毆之海舶私梟動逾千百往捕則持械拒大獄迭興羅織牽連數歲不息而位創議裁引革商歲額課稅歸竈完納如農完賦任人轉運聽其所之則諸弊可革而國賦不乏巡撫趙國麟心韙之格於例不行未幾引疾歸乾隆三年起官四川鹽茶道副使蜀鹽產於井課由井納民使之雍正中有請設引招商增課者四川鹽政自此壞商無餘資運不足額民持錢不得鹽而非鹽滯積不售因以致訐而位欲事釐剔大吏畏難不可力爭愈嫉之改松茂道調永甯道參議居常鬱鬱不得行其志惟與諸生講學尋卒於官而位生平服膺王守仁曰尊所聞行所知須不流於弊尊陽明而不知其流弊非善學陽明尊朱子而不知其流弊亦非善學朱子蓋謂王氏高明弊在躐等朱子格物弊恐拘而不化著省克引劉氏家訓爲學者所稱

論曰起元深於經術當朝政尙嚴能持以平恕師儉以勤敏繼祖以明肅並見

重於時維翰有幹局旬尤能澤以儒效葉滋撫循苗疆未竟其用而位議變鹽
法亦不得申其志而但以學術名國家重視監司所以擴循良之績儲封疆之
選若諸人者可謂無忝矣

清史稿

列傳八十八

訥親

傳恒

子滿洲鑲黃旗人額亦都曾孫父尹德附見其父遏必隆傳訥親

滿洲鑲黃旗人額亦都曾孫父尹德附見其父遏必隆傳訥親

訥親鈕祜祿氏滿洲鑲黃旗人額亦都曾孫父尹德附見其父遏必隆傳訥親其次子雍正五年襲公爵授散秩大臣十年授鑾儀使十一年十二月命在辦理軍機處行走十三年世宗疾大漸訥親預顧命高宗卽位莊親王允祿果親王允禮鄂爾泰張廷玉輔政號總理王大臣授訥親鑲白旗滿洲都統領侍衛內大臣協辦總理事務十二月敕獎訥親勤慎因推孝昭仁皇后外家恩進一等公乾隆元年遷鑲黃旗滿洲都統二年遷兵部尙書十一月莊親王等請罷總理事務訥親授軍機大臣叙勞加拖沙喇哈番世職三年二月領戶部三庫九月命協辦戶部直隸總督李衛劾總河朱藻詐欺貪虐命訥親與尙書孫嘉淦勘讞藻坐流訥親因與嘉淦條上永定河南北岸建築閘壩諸事十二月遷吏部尙書四年五月加太子太保訥親貴戚勳舊少侍禁近受世宗知以爲可大用迨高宗恩眷尤厚訥親勤敏當上意尤以廉介自敕人不敢干以私其居

第巨繫縛扉側絕無車馬跡然以早貴意氣驕溢治事務刻深左都御史劉統
勳疏論訥親領事過多任事過銳上諭曰訥親爲尙書模稜推諉固所不可但
治事未當亦所不免朕時時戒毋自滿今見此奏益當自勉語詳統勳傳九年
正月命訥親閱河南江南山東諸省營伍並勘海塘河工時直隸天津河間二
府方以災治賑令順道先往察覈疏請展賑一月從之訥親使事旣蒞分疏上
陳其勘諸省營伍言徧閱三省督撫河漕提鎮爲標者十七優絀互見惟河南
南陽江南蘇松水師二鎮最劣請下部覈賞罰其勘江浙海塘言舊日浙江潮
自蜀山中小疊出入近海寧爲北大疊近蕭山爲南大疊張沙寬闊爲杭州紹
興二府保障迨中小疊漸湮潮趨蜀山北震盪爲患若濬中小疊故道減大疊
潮力上下塘工悉可安堵卽中小疊未可遽復則當擇險要多爲坦坡木石戢
壩俾敵水積淤資以禦潮至諸處柴塘停沙阻水無煩議改石工入江南境地
平而潮緩華亭舊塘堅緻寶山新塘尺度參差工作又不中程金山奉賢南匯
上海皆土塘距海稍遠所司守護如法當無他虞其勘洪澤湖請濬鹽河俾通

江疏串場河俾達海並停天然三壩高堰下游二隄其勛南旺湖請以湖中涸地貸貧民耕稼別疏言各直省政事督撫下司道司道下州縣州縣官惟以簿書錢穀爲事戶口貧富土地肥瘠物產豐嗇民情向背風俗美惡以及山川原隰橋梁道路皆漫置不省官但有條教民惟責納賦浮文常多實意殊少請敕各直省督撫令州縣官徧歷境內何事當興舉何事當整飭行之有無治效以實報長官長官卽是爲殿最以實達朝廷似亦崇實效去虛文飭吏治厚民生之一端也皆下部議行十年三月協辦大學士五月授保和殿大學士仍兼吏部尙書十二年四月命如山西會巡撫愛必達讞萬全民張世祿安邑民張遠等挾衆抗官狀論如律愛必達及總兵羅俊蒲州知府朱發等皆坐譴黜十三年正月命如浙江會大學士高斌覆勘巡撫常安貪婪狀未至高斌鞫得常安實受賕納親與其奏論如律三月復命如山東會巡撫阿里衮治賑時大金川土司莎羅奔改革布什咱土司犯邊上命川陝總督張廣泗討之大金川地絕險阻山爲石壘名曰礮師進攻弗克四月召訥親還京師授經略大臣率禁旅

出視師六月訥親至軍下令期三日克噶拉依噶拉依者莎羅奔結寨地也師循色爾力石梁而下攻碉未卽克署總兵任舉勇敢善戰爲諸軍先沒於陳訥親爲氣奪乃議督諸軍築碉與敵共險爲持久疏入上重失任舉又以築碉非計手詔戒訥親因時度勢以爲進止訥親與廣泗合疏言天時地利皆賊得其長我兵無機可乘冬春間當減兵駐守明歲加調精銳三萬於四月進剿足以成功至遲亦不逾秋令訥親又別疏言來歲增兵計需費數百萬若俟二三年後有機可乘亦未可定疏入上諭曰卿等身在戎行目擊情狀不能確有成算游移兩可朕於數千里外何從遙度我師至四萬彼止三千餘何以彼應我則有餘我攻彼則不足卿等當審定應攻應罷毋爲兩歧語上知訥親不足辦敵諭軍機大臣議召訥親還又念大金川非大敵重臣視師無功而還傷國體爲四夷笑密以諭訥親獎激奮克敵居數月師雖有小勝卒未得尺寸地訥親惟請還京面對乃召訥親及廣泗詣京師以岳鍾琪攝經略傅爾丹攝川陝總督復遣尙書班第同治軍事尋奪訥親官令自具鞍馬從討噶爾丹贖罪逮廣

泗九月命大學士傅恒代爲經略別遣侍衛富成速訥親責置對並令富成錄
訥親舉止言語以聞上前後手詔罪訥親恒數千百言略謂訥親受命總戎乖
張畏縮疏言軍夜攻碉自帳中望見火光知未嘗臨敵又言督軍攻阿利山既
回營我軍數千人各鳥獸散知偶臨敵又先士卒退富成疏訥親語金川事大
難不可輕舉此言不敢入奏訥親受恩久何事不可言如固不能克當實陳請
罷兵乃事敗欲以不可輕舉歸過朝廷狡詐出意外又值續調兵過輒言此皆
我罪令如許滿洲兵受苦滿洲兵聞調鼓舞振躍志切同仇訥親以爲受苦實
嫉他人成功搖衆心不顧國事孤恩藐法罪不可道十月諭訥親先世以軍功
封二等公爲孝昭仁皇后戚屬供職勤慎進一等公獲罪應仍以二等公俾其
兄策楞襲爵訥親恃上恩尙冀入見上自解上復迭降手詔謂軍旅事重平日
治事詳慎操守潔清舉不足言又謂訥親小心謹密而方寸一壞天奪其魄雖
欲倖免而不能十二月廣泗既誅上封遏必隆遣刀授侍衛鄂實監訥親還軍
誅以警衆十四年正月上命傅恒班師復諭鄂實卽途中行法是月戊寅鄂實

監訥親行至班欄山聞後命遂誅訥親

傅恒字春和富察氏滿洲鑲黃旗人孝賢純皇后弟也父李榮保附見其父米思翰傳傅恒自洊侍衛擢戶部侍郎乾隆十年六月命在軍機處行走十二年擢戶部尚書十三年三月孝賢純皇后從上南巡還至德州崩傅恒扈行典喪儀四月敕獎其勤恪加太子太保時訥親視師金川解尚書阿克敦協辦大學士以授傅恒並兼領吏部訥親既無功九月命傅恒暫管川陝總督經略軍務尋授保和殿大學士發京師及諸行省滿漢兵三萬五千以部庫及諸行省銀四百萬供軍儲又出內帑十萬備犒賞十一月師行上詣堂子告祭遣皇子及大學士來保等送至良鄉傅恒既行上日降手詔褒勉傅恒道陝西言驛政不修誤軍興上命協辦大學士尚書尹繼善攝陝西總督主饋餉入四川境馬不給上又命尹繼善往來川陝督察旋以傅恒師行甚速紀律嚴明命議叙部議加太子太傅特命加太保固辭不允發京師及山西湖北馬七千佐軍傅恒發成都經天赦山雪後道險步行七十里至驛上聞賜雙眼孔雀翎復固辭初小

金川土舍良爾吉問其兄澤旺於莎羅奔奪其印卽悉於嫂阿扣莎羅奔之犯邊也良爾吉實從之後詐降爲賊謀張廣泗入奸民王秋言使領蠻兵我師舉動賊輒知之傳恒途中疏請誅良爾吉等將至軍使副將馬良柱招良爾吉來迎至邦噶山正其罪併阿扣王秋悉誅之事聞上褒傳恒明斷命拜前賜雙服孔雀翎母更固辭十月至卡撒以屯軍地狹隘與賊相望且雜處番民市肆中乃相度移舊壘前令總兵冶大雄監營壘十四年正月上疏言臣至軍察用兵始末當紀山進討之始馬良柱轉戰而前踰沃日收小金川直抵丹噶其鋒甚銳彼時張廣泗若速進師賊備未暇殄滅尙易乃坐失事機宋宗璋宿留於雜谷許應虎敗績於的郊賊得盡據險要增礮備禦訥親初至督戰甚急任舉敗沒銳挫氣索軍無門志一以軍事委張廣泗廣泗又爲奸人所愚專主攻礮先後殺傷數千人匿不以聞臣惟攻礮最爲下策鎗礮不能洞堅壁於賊無所傷賊不過數人自暗擊明鎗不虛發是我惟攻石而賊實攻人賊於礮外爲濠兵不能越賊伏其中自下擊上其礮銳立高於浮屠建作甚捷數日可成旋缺旋

補且衆心甚固礮盡碎而不去礮方過而復起客主勢佚形勢迥殊攻一礮難於克一城卽臣所駐卡撤左右山巔三百餘礮計日以攻非數年不能盡且得一礮輒傷數十百人得不償失兵法攻堅則瑕者堅攻瑕則堅者瑕惟使賊失所恃我兵乃可用其所長擬俟諸軍大集分道而進別選銳師旁探間道裹糧直入礮礮勿攻繞出其後番衆不多外備旣密內守必虛我兵旣自捷徑深入守者各懷內顧人無固志均可不攻自潰卡撤爲進噶拉依正道嶺高溝窄臣當親任其難黨壩隘險亦幾同卡撤酌益新軍兩道並進直搗巢穴取其渠魁期四月間奏捷上以金川非大敵勞師兩載誅大臣失良將內不懌及是聞其地險難下益不欲竟其事遂以孝聖憲皇后諭命班師而傅恒方督總兵哈喇龍哈尙德等攻下數礮上以金川水土惡賜傅恒人蔭三斤並及諸將有差屢詔召傅恒還又以孝聖憲皇后諭封一等忠勇公賜寶石頂四團龍補服傅恒奏言金川事一誤今復輕率蒞事賊饑愈張衆土司皆罹其毒邊宇將無寧日審度形勢賊礮非盡當道其巢皆老弱我兵且戰且前自昔嶺中峯直抵噶拉

依破竹建議功在垂成棄之可惜且臣受詔出師若不掃穴擒渠何顏返命並力辭封賞上不允手詔謂匈奴未滅無以家爲乃驍姚武人銳往之慨大學士并誠實化豈與兜鍪鬪爭一日之績反復累數千言復賜詩喻指時傳恒及提督岳鍾琪決策深入莎羅奔遣頭人乞降傳恒令自縛詣軍門莎羅奔復介綽斯申等詣岳鍾琪乞貸死鍾琪親入勒烏圍擊莎羅奔及其子耶吉詣軍門語詳鍾琪傳傳恒遂受莎羅奔父子降莎羅奔等焚香作樂誓六事無犯鄰比諸番反其侵地供役視諸土司執獻諸酋抗我師者還所掠內地民馬納軍械鎗礮乃承制赦其罪莎羅奔獻佛像一白金萬傳恒卻其金莎羅奔請以金爲傳恒建祠翌日傳恒率師還上優詔嘉獎命用楊吉利故事賜豹尾槍二桿親軍二名三月師至京師命皇長子及裕親王等郊迎上御殿受賀行飲至禮傳恒疏辭四團龍補服上命服以入朝復命用額亦都魯圖維故事建宗祠祀曾祖哈什屯以下並追子李榮保謚賜第東安門內以詩落其成十九年準噶爾內亂諸部台吉多內附上將用兵諮廷臣惟傳恒贊其議二十年師克伊犁俘

達瓦齊以歸諭再封一等公傳恒固辭至泣下乃允之尋圖功臣象紫光閣上親製贊仍以爲冠舉蕭何不戰居首功爲比二十一年四月將軍策楞追捕阿睦爾撒訥未獲上命傳恒出視師赴額林哈畢爾噶集蒙古諸台吉飭軍事傳恒行日策楞疏至已率兵深入復召傳恒還三十三年將軍明瑞征緬甸敗績二月授傳恒經略出督師時阿里袞以副將軍主軍事上並授阿桂副將軍舒赫德參贊大臣命舒赫德先赴雲南與阿里袞籌畫進軍三十四年二月傳恒師行發京師及滿蒙兵一萬三千六百人從征上御太和殿賜敕賚御用甲冑四月至騰越傳恒決策師循憂鳩江而進大兵出江西取道猛拱猛養直搗木梳水師沿江順流下水陸相應偏師出江東取猛密夾擊老官屯往歲以避瘴九月後進兵緬甸得爲備傳恒議先數日出不意攻其未備水師當具舟上初命阿里袞造舟濟師阿里袞等言崖險澗窄不宜舟傍江亦無造舟所上又命三泰傳顯往視言與阿里袞等同及傳恒至軍諮土司頭人知蠻彝有山曰翁古多木旁有地曰野牛壩野人所居涼爽無瘴卽地伐木造舟野人樂受值

執役甚謹傳恒卽使傳顯佐蒞事舟成督滿漢兵並從行奴僕更番轉般又得茂隆廠附近職工令範銅爲礮狀聞礮降旨嘉獎爲賦造船行焉傳恒初議自將九千三百人渡憂鳩而西師未集七月將四千人發騰越上以經略自將師真促諸軍速集如初議八月傳恒自南蚌趨憂鳩奏至上方行圍木蘭入圍獲磨界福隆安以賜傳恒傳恒道南底壩至允帽臨憂鳩江時猛拱大頭人脫猛烏猛頭人賀丙等詣傳恒請降師至脫猛烏猛將夾江諸夷寨頭人來迎與賀丙具舟傳恒命分兵徐濟夾江爲寨猛拱後土司渾覺亦請降獻馴象四上寶三眼孔雀翎傳恒疏辭師復進取猛養破寨四誅頭人拉匿拉賽設臺站令瑚爾起以七百人駐守遂至南董干攻南準寨獲頭人木波猛等三十五人進次暮臘再進次新街傳恒自渡憂鳩江未嘗與緬甸兵戰刈禾爲糧行二千里不血刃而士馬觸暑雨多疾病會阿桂將萬餘人自虎踞關出野牛壩追舟畢成徵廣東福建水師亦至乃合軍並進哈國興將水師阿桂阿里袞將陸師阿桂出江東阿里袞出江西緬兵壘金沙江兩岸又以舟師扼江口阿桂先與緬兵

遇麾步兵發銃矢又以騎兵陷陳緬兵潰哈國興督舟師乘風蹴敵緬兵舟相擊死者數千阿里袞亦破西岸緬兵傅恒以所獲糧進上復爲賦詩阿里袞感瘳而病改將水師旋卒十一月傅恒復進攻老官屯老官屯在金沙江東東猛密西猛噠北猛拱猛養南緬都阿瓦爲水陸通衢緬兵伐木立寨甚固哈國興督諸軍力攻未卽克師破東南木寨緬兵夜自水寨出傅恒令海蘭察禦之又令伊勒圖督舟師掩擊復獲船糧緬兵潛至江岸築壘又自林箐中海蘭察擊之屢有斬馘師久攻堅士卒染瘳多物故水陸軍三萬一千至是僅存一萬三千傅恒以入告上命罷兵召傅恒還京傅恒俄亦病阿桂以聞上令卽馳驛還而以軍事付阿桂會緬甸曾轡駁遣頭人諾爾塔齋蒲葉書乞罷兵傅恒奏入上許其行成傅恒附疏言用兵之始衆以爲難臣執意請行負委任請從重治罪上手詔謂用兵非得已如以爲非是朕當首任其過皇祖時吳三桂請撤藩詔於羣臣議撤者惟米思翰明珠數人及三桂反衆請誅議撤諸臣皇祖深闕其非朕仰紹祖訓傅恒此事可援以相比傅恒收猛拱當賜三眼孔雀翎疏

辭俟功成拜賜今既未克賊巢當繖進賜餉以稱其請罪之意督駁遣頭人詣軍獻方物十月傳恒還駐虎踞關上命傳恒會雲貴總督彰寶議減雲南總兵知府員缺釐正州縣舊制三十四年二月班師三月上幸天津傳恒朝行在既而緬甸曾謝罪表久不至上謂傳恒方病不忍治其罪七月卒上親臨其第酌酒命喪葬視宗室鎮國公諡文忠又命入祀前所建宗祠其後上復幸天津念傳恒於此復命又經傳恒墓賜奠皆紀以詩及賦懷舊詩許爲社稷臣嘉慶元年以福康安平苗功贈貝子福康安卒推恩贈郡王銜旋並命配享太廟傳恒直軍機處二十三年日侍左右以勤慎得上眷故事軍機處諸臣不同入見乾隆初惟訥親承旨迨傳恒自陳不能多談乞諸大臣同入見上晚膳後有所諮訪又召傳恒獨對時謂之晚面又軍機處諸大臣既承旨退自屬草至傳恒始命章京具稿以進上倚傳恒爲重臣然偶有小節疏失卽加以戒約傳恒益謙下治事不敢自擅敬禮士大夫翼後進使盡其才行軍與士卒同甘苦卒時未五十上尤惜之子福靈安福隆安福康安福長安福康安自有傳福靈安多羅

額駙授侍衛準噶爾之役從將軍兆惠戰於葉爾羌有功予雲騎尉世職三十二年授正白旗滿洲副都統署雲南永北鎮總兵卒福隆安尙高宗女和嘉公主授和碩額駙御前侍衛三十三年擢兵部尙書軍機處行走移工部尙書三十五年襲一等忠勇公三十六年用兵金川總兵宋元俊劾四川總督桂林命福隆安往讞福隆安直桂林抵元俊罪四十一年復授兵部尙書仍領工部金川平畫像紫光閣四十九年卒謚勤恪子豐紳濟倫初以公主子命視和碩駙品秩授鑲藍旗漢軍副都統奉宸苑卿四十九年襲爵累遷兵部尙書領鑾儀衛嘉慶間再坐事官終盛京兵部侍郎十二年卒子富勒渾翁珠襲爵福長安自藍翎侍衛累遷至正紅旗滿洲副都統武備院卿領內務府四十五年命在軍機處學習行走累遷戶部尙書五十三年臺灣平五十七年廓爾喀平諸功臣畫像紫光閣福長安皆與焉嘉慶三年俘王三槐福長安以直軍機處得侯四年高宗崩大學士和珅得罪仁宗以福長安阿附逮下獄奪爵籍其家諸大臣議用朋黨律坐立斬上命改監候而賜和珅死使監福長安詣和珅死所跪

視旋遣往裕陵充供茶拜唐阿就選員外郎六年以請還京奪職發盛京披甲旋自驍騎校屢遷再爲圍場總管一爲馬蘭鎮總兵再署古北口提督屢坐事譴謫二十一年授正黃旗滿洲副都統二十二年卒

論曰高宗初政寬大而清明舉國熙熙樂見太平是時鄂爾泰張廷玉負夾輔之重然居中用事爲天子喉舌厥惟訥親繼之者傅恒也高宗手詔謂當鄂爾泰在朝培養陶成得一訥親訥親在朝培養陶成得一傅恒又謂訥親受恩第一次則傅恒訥親視師失上指坐誅終不沒其勤廉傅恒再以受降還師德心孚契自以其謹慎非徒藉貴戚功閹重也

清史稿

列傳八十九

徐本

汪由敦 子永福

來保

劉綸 子顯

劉統勳 子顯 孫顯之

徐本字立人浙江錢塘人尚書潮子本康熙五十七年進士改庶吉士授編修雍正五年提督貴州學政授贊善遷侍讀七年擢貴州按察使八年調江蘇遷湖北布政使十年擢安慶巡撫奏定比組盜賊章程竊案責府州盜案責臬司案多而未獲巡撫親提比立限定勸懲上嘉之十一年疏言雲貴廣西改流土司安置內地例十人給官房五楹地五十畝安慶置二十一人地遠在來安請變價別購俾耕以食又疏言州縣徵糧例由府道封櫃請改州縣自封完糧十截串票改仍用三連由票客戶銀以下以十錢當一分又疏言壽州濱淮盜聚族而居假捕魚爲業每出劫掠已次第捕治令漁船編甲孫平焦鄧諸姓設族正有盜不時舉發皆下部議行召授左都御史十二年遷工部尚書協辦大學

士浙江衢州民王益善邪教惑衆命本會總督程元章按治請改設衢州總兵金衢嚴巡道以下官并更定營制下部議行十三年五月命同寶親王果親王大學士鄂爾泰張廷玉等辦理苗疆事務高宗卽位命在辦理軍機處行走調刑部尙書尋命協辦總理事務乾隆元年授東閣大學士兼禮部尙書充世宗實錄總裁二年直南書房以協辦總理事務予拖沙喇哈番世職三年授辦理軍機大臣四年加太子太保七年兼管戶部尙書九年六月以病乞休加太子太傅致仕遣御前侍衛永興齋賜御用衣冠內府文綺貂皮上親臨其第慰問賜詩命其子侍講學士以烜送歸里在籍食俸明年上念本歸將一載復賜詩十二年本卒加少傅發白金千治喪浙江巡撫顧琮往祭諡文穆上南巡所經郡縣道祭舊臣禮部奏請未及本上特命遣祭祀京師賢良祠以烜進士官至禮部侍郎

汪由敦字師茗浙江錢塘人原籍安徽休甯雍正二年進士選庶吉遭士父喪以纂修明史命在館守制喪終三遷內閣學士直上書房二年廷臣妄傳除目

爲言官執奏語連由敦未得旨由敦具疏辨上詰由敦何以先知足見有爲之耳目者其人必不謹左授侍讀學士累遷工部尙書關刑部兼署左都御史十一年命在軍機處行走十四年金川平加太子少師是歲命協辦大學士由敦出大學士張廷玉門其直軍機處廷玉薦也時軍機處諸大臣鄂爾泰已卒廷玉爲班首而訥親被上眷日入承旨出令由敦屬草慮不當上意輒令易稿至三四不已傳恒爲不平及訥親誅傳恒自金川還朝引諸大臣共承旨以爲常廷玉致仕將歸以世宗遺詔許配享太廟乞上一言爲券謝恩未親至傳旨詰責傳恒與由敦承旨由敦免冠叩首言廷玉蒙恩體恤乞終始矜全若明旨詰責則廷玉罪無可追次日廷玉早入朝上責由敦漏言徇師生私恩不顧公議解協辦大學士并罷尙書仍在尙書任贖罪十五年命復任上閱永定河工令由敦同大學士傳恒總督方觀承會勘南岸建壩請於張仙務雙營舊壩二馬家鋪及冰窖以東增新壩亦二如所議四川學政朱荃以匿喪擅賄得罪由敦所薦舉吏議奪職上以由敦謹慎長於學問命降授兵部侍郎俄永定河堤

決復命赴固安監塞口有請別開新河者由敦主仍沿舊河亦如所議十六年調戶部侍郎命同大學士高斌勘天津等處河工請濬永定河下流疏王慶坨引河增鳳河堤壩培東岸隄障東淀十七年授工部尚書十九年加太子太傅兼刑部尚書二十年準噶爾平軍機大臣得議叙二十一年調工部尚書二十二年授吏部尚書二十三年卒上親臨賜奠贈太子太師諡文端由敦篤內行記誦尤淹博文章典重有體內直幾三十年以恭謹受上知乾隆間大臣初入直軍機處上以日所製詩用丹筆作草或口授令移錄謂之詩片久無誤乃使撰擬諭旨由敦能強識當上意上出謁陵及巡幸必從入承旨耳受心識出卽傳寫不遺一字其卒也諭稱其老誠端恪敏慎安詳學問淵深文辭雅正並賦詩悼之又以由敦善書命館臣排次上石日時晴齋法帖上賦懷舊詩列五詞臣中稱其書比張照云子承沆承需承需字春農由敦旣卒喪終承需以賜祭葬入謝傳恒爲言承需書類由敦授兵部主事充軍機處章京累遷郎中除福建邵武知府時母年八十請軍機大臣爲陳情留京供職復補戶部郎中

三十六年師討小金川上命戶部侍郎桂林出督餉以承需從三十七年阿爾
泰宋元俊勅桂林以金與土酋贖所掠軍士辭連承需命速治俄事白仍以郎
中充軍機處章京累遷工部右侍郎甘肅冒賑事發部議凡在甘肅納捐監生
應禁革毋許應試及自別途出身承需奏人數甚多乞開自新之路令納金如
例許考試及自別途出身得旨俞允四十年上校射承需連發中的賞花翎調
戶部右侍郎五十四年坐監臨順天鄉試失察左遷通政使累遷復至侍郎嘉
慶五年授左都御史遷兵部尚書兼領順天府尹六年永定河水溢上命治賑
得旨獎叙七 years 上將幸木蘭承需請罷停園不許尋改左都御史署兵部尚書
北城盜發上責承需不稱職以二品冠服致仕十年卒詔視尚書例議卹

來保字學圃喜塔臘氏滿洲正白旗人初隸內務府康熙中自庫使授侍衛再
奪職五十七年復授三等侍衛雍正初擢內務府總管坐內務府披甲裁額衆
聞廉親王允禩第來保等奏不實復奪職起景陵掌關防郎中再遷復爲內務
府總管署工部尚書疏言滿洲騎射較優沿邊古北口諸處提鎮以下請兼用

滿洲資控制從之乾隆元年十二月大學士管浙江總督嵇曾筠江蘇巡撫邵
基統請停辦戊午銅運下部議來保奏積欠數盈六百萬應停辦一年以清舊
款但己未以後仍招商採買行之數年積欠復多又當停辦請敕部並下各直
省督撫曉諭聽商具贖本出洋採買不必先給價值隨到卽收不拘多寡但不
得尅扣勒重滋商累總理王大臣議覆允行二年六月上以運河水淺糧船
至臨清以北尤多阻滯由於衛河上游各渠口居民私洩過多敕直隸河南督
撫等照前河臣靳輔題准定例稽查嚴禁來保奏膏水淺運阻查禁不得不嚴
但衛水發源河南至臨清五百餘里沿河居民不知幾千萬家待溉之地不知
幾千百頃今秋成在望已非灌溉之期所慮者有司奉行過當後雖運河未至
淺阻而一入五月渠口盡行堵塞坐使有用之利置之無用恐不無廢時失業
者不稱仁育萬民之意當使漕運不致淺阻民田亦得灌溉或暫禁於淺阻之
年而不禁於深通之歲應令督撫河道諸臣悉心調劑以期兩便疏入上命侍
郎趙殿最侍衛安甯會同督撫查勘請於漕船將抵臨清視運河水盈縮定集

開啓閉十二月授工部尙書兼議政大臣四年病請解任上不許十二月授內
大臣賜紫禁城內騎馬五年調刑部尙書上以來保奉職勳命改隸滿洲正白
旗所立佐領准世襲六月御史沈世楓奏來保誠愍有餘習練不足不勝刑部
繁要之任諡曰來保人實可信然世楓所言頗中其病憊因此自知省惕則心
志虛公而才識亦將日進此聞過而喜所以稱賢也九年命如奉天按將軍額
洛圖侵餉納賄狀論如律十年調禮部尙書加太子太保授領侍衛內大臣尋
授吏部尙書協辦大學士十二月授武英殿大學士十三年九月命爲軍機大
臣十四年金川凱旋進太子太傅兼管兵部刑部事十五年三月來保年七十
上製詩賚之十六年兼管吏部事二十五年來保年八十復賜御製詩二十六
年兼管禮部事二十九年卒年八十四贈太保祀賢良祠諡文端四十四年御
製懷舊詩列五閣臣中來保能知人舒赫德官烏里雅蘇台將軍疏請徙阿睦
爾撒納眷屬於邊上以其傷遠人心震怒遣使封刀斬之來保爭甚力以爲才
可大用上亦悔第曰已降旨來保曰卽上有恩命臣子成麟善麟遣追前使還

上允之歸召成麟使齋詔追前使還成麟日夜馳三百餘里先使三日到舒赫德賴以免來保善相馬上嘗爲相馬歌賜之

劉綸字春涵江蘇武進人少雋穎六歲能綴文長工爲古文辭乾隆元年以廩生舉博學鴻詞試第一授編修預修世宗實錄遷侍講進太常寺少卿四遷擢內閣學士十二年扈蹕木蘭奏秋郊大獵哨鹿二賦稱旨十四年直南書房授禮部侍郎調工部十五年命軍機處行走十六年土默特貝子哈木噶巴雅斯呼朗圖不按原議年限驅種地流民命綸偕侍讀學士麒麟保往勘六月疏言出口民償典旗地應遵原議三年五年限外撤還原主其領地耕種爲佃戶受雇力作爲傭工皆浮寄謀生初無佔地意應許力耕餬口至領地墾荒積累辛勤始得成熟不同償典年滿先還原主所需自種地有贏仍給種以償前勞木頭城三坐塔居人稠密許照常居住設三坐塔巡檢一資彈壓詔從其議父憂歸服闋十八年除戶部侍郎十九年兼順天府尹故事順天府公牘治中通判不署名綸請以錢穀屬治中獄訟屬通判先署牘呈尹可否之大軍西征準噶

爾師行役車供侍立切辦治無誤二十年準噶爾平予獎叙浙江按察使富勒
渾劾巡撫鄂樂舜授意布政使同德勒派商銀命綸如浙江借兩江總督尹繼
善等會訊二十一年覆奏鄂樂舜受銀屬實擬絞候同德未知情富勒渾誣劾
擬杖流上以富勒渾參款已實不應議罪責綸等失當部議奪官有旨從寬留
任罷直軍機處二十二年命仍入直二十四年六月奏薊州寶坻等縣蠲子萌
動州縣官事繁督捕未能周徧飭千把外委同佐雜分捕叅將偕監司巡察勦
情報可進左都御史二十五年偕侍郎伊祿順赴西安勘將軍嵩阿禮剋兵糧
勒餽送等款得實論如律二十六年進兵部尙書二十八年調戶部協辦大學
士加太子太保三十年母憂歸甫除喪詔起吏部尙書仍協辦大學士三十六
年授文淵閣大學士兼工部尙書三十八年卒命皇子臨其喪贈太子太傅祀
賢良祠謚文定綸性至孝親喪三年不御酒肉直軍機處十年與大學士劉統
勳同輔政有南劉東劉之稱器度端凝不見有喜愠色出入殿門進止有恒處
自工部侍郎歸買宅數楹後服官二十年未嘗益一椽半雙衣履垢敝不改作

朝必盛服曰不敢褻朝章也侍郎王昶充軍機處章京嘗嚴冬有急奏具草夜半詣編繪起然燭操筆點定寒甚呼家人具酒脯而厨傳已空僅得白聚十數枚侑酒其清儉類此校士尤矜慎嘗曰衡文始難在取繼難在去文佳劣相近一去取間於我甚易獨不爲士子計乎較量分寸輒至夜分不勸爲文法六朝根柢漢魏於詩喜明高啟謂能入唐人門闕子躍雲字服先乾隆三十一年進士及第授編修累遷禮部侍郎六十年充會試副考官以校閱失當下吏議左遷奉天府府丞罷歸嘉慶四年召爲大理寺少卿遷工部侍郎上御門躍雲誤班未至左遷內閣學士復授兵部侍郎休致卒殿試例糊名躍雲對策高宗親置上第喜曰此劉綸子不意朕竟得之及視學江西有清名高宗意嚮用以忤和珅主會試坐浮言黜仁宗召起老矣終不竟其用子逢祿見儒林傳

劉統勳字延清山東諸城人父榮官四川布政使統勳雍正二年進士選庶吉士授編修先後直南書房上書房四遷至詹事乾隆元年擢內閣學士命從大學士嵇曾筠赴浙江學習海塘工程二年授刑部侍郎留浙江三年還朝四年

母憂歸六年授刑部侍郎服闋詣京師擢左都御史疏言大學士張廷玉歷事三朝遭逢極盛然晚節當慎責備恒多竊聞輿論動云張姚占二姓半部縉紳張氏登仕版者有張廷璐等十九人姚氏與張氏世婚仕宦者姚孔鋌等十人二姓本桐城巨族其得官或自科目薦舉或起襲臆議叙日增月益今未能遽議裁汰惟稍抑其遷除之路使之戒滿引嫌卽所以保全而造就之也請自今三年內非特旨擢用概停升轉又言尙書公訥親年未強仕綜理吏戶兩部典宿衛贊中樞兼以出納王言時蒙召對屬官奔走恐後同僚亦爭避其鋒部中議擬事件或輾轉駁詰或過目不留出一言而勢在必行定一毫而限逾積日殆非懷謙集益之道請加訓示俾知省改其所司事或量行裁減免曠廢之虞兩疏入上諭曰朕思張廷玉訥親若果擅作威福劉統勳必不敢爲此奏今既有此奏則二臣並無聲勢能箝制寮案可知此國家之祥也大臣任大責重原不能免人指摘聞過則喜古人所尙若有幾微芥蒂於胸臆間則非大臣之度矣大學士張廷玉親族甚衆因而登仕籍者亦多今一經察議人知謹飭轉於

廷玉有益訥親爲尙書固不當模稜推諉但治事或有未協朕時加教誨誠令
毋自滿足今見此奏益當自勉至職掌太多如有可減候朕裁定尋命以統勦
疏宣示廷臣命勘海塘十一年署漕運總督還京十三年命同大學士高斌按
山東賑務並勘河道時運河盛漲統勦請濬聊城引河分運河水注海德州哨
馬營東平戴村二壩皆改令低沂州江楓口二壩俟秋後培高俾水有所洩遷
工部尙書兼翰林院掌院學士改刑部尙書十七年命軍機處行走十八年以
江南邵伯湖減水二閘及高郵車邏壩決命偕署尙書策楞往按合疏言河員
虧帑誤工詔奪河督高斌協辦河務巡撫張師載職窮治侵帑諸吏九月銅山
店汎河決統勦疏論同知李焯守備張寶呈報稽誤上以焯寶平日侵帑聞且
窮治自知罪重河漲任其衝決立命誅之並繫斌師載令視行刑統勦駐銅山
督塞河十二月工成統勦偕策楞疏陳稽察工料諸事詔如所議行大學士陳
世倌疏言黃河入海套櫃增多致壅塞命統勦往勘統勦疏言海口舊在雲梯
關今海退河淤增長百餘里櫃套均在七曲港上河流無所阻遏上又命清察

江南河工未結諸案統勳疏言未結欸一百一十一萬有奇請定限核報又以河道總督顧琮請於祥符榮澤諸縣建壩並濬引河命統勳往勘統勳議擇地培隄壩引河上無來源中經沙地易淤墊當罷上從之十九年加太子太傅五月命協辦陝甘總督賜孔雀翎時方用兵準噶爾統勳請自神木至巴里坤設站一百二十五並裁度易馬運糧諸事命如所議速行二十年廷議駐兵巴里坤哈密命察勘統勳至巴里坤阿睦爾撒納叛攻伊犁伊犁將軍班第死事未得報定西將軍永常自木壘引師退統勳疏請還守哈密上責其附和永常置班第於不問命並永常奪職逮治其子壻亦奪職與在京諸子皆下刑部獄籍其家旋上怒解諭統勳所司者糧餉馬駝軍行進止將軍責也設令模稜之人緘默不言轉可不至獲罪是其言雖謬心尚可原永常尙不知死綏何怪於統勳統勳在漢大臣中尙舊往任事從寬免罪發往軍營交班第等令治軍需贖罪釋其諸子二十一年六月授刑部尙書尋命勘銅山縣孫家集漫工解總河富勒赫任卽命統勳暫攝是冬工竟二十二年命赴徐州督修近城石壩加太

子太保二十三年調吏部尙書二十四年命協辦大學士二十六年拜東閣大學士兼管禮部兵部八月偕協辦大學士兆惠查勘河南楊橋漫工十二月工竟二十七年上南巡復命偕兆惠勘高寶河湖入江路疏請開引河擇地築閘壩上諭謂所議甚合朕意又以直隸景州被水命勘德州運河疏請移吏董理四女寺哨馬營兩引河毋使淤闕二十八年充上書房總師傅兼管刑部教習庶吉士三十三年命往江南酌定清口疏濬事宜三十四年復勘疏運河三十八年十一月卒是日夜漏盡入朝至東華門外輿微側啓帷則已暝上聞遣尙書福隆安齎藥馳視已無及贈太傅祀賢良祠諡文正上臨其喪見其儉素爲之慟回蹕至乾清門流涕謂諸臣曰朕失一股肱旣而曰如統勳乃不愧眞宰相統勳歲出按事如廣東按糧驛道明福違禁折收如雲南按總督恒文巡撫郭一裕假上貢抑屬吏賤值市金如山西按布政使蔣洲抑屬吏補虧帑如陝西按西安將軍都資侵餉如歸化城按將軍保德等侵帑如蘇州按布政使蘇崇阿誤諭書吏侵帑如江西按巡撫阿思哈受賂皆論如律其視楊橋漫工也

河吏以芻茭不給爲辭月餘事未集統勳微行見大小車載芻茭凡數百輛皆弛裝困臥有泣者問之則主者索賄未遂置而不收也卽令縛主者至數其罪將斬之巡撫以下爲固請乃杖而荷校以徇薪芻一夕收立盡逾月工遂竟方金川用兵統勳屢議撤兵及木果木軍覆上方駐熱河統勳留京治事天暑甚以兼上書房總師傳檢視諸皇子日課廷寄急召比入對上曰昨軍報至木果木軍覆溫福死綏朕煩懣無計用兵乎抑撤兵乎統勳對曰日前兵可撤今則斷不可撤復問誰可任者統勳頓首曰臣料阿桂必能了此事上曰朕正欲專任阿桂特召卿決之卿意與合事必濟矣卽日令還京師戶部疏論諸行省州縣倉庫多空闕上欲盡罷州縣吏不職者而以筆帖式等官代之召統勳諭意且曰朕思之三日矣汝意云何統勳默不言上詰責統勳徐曰聖聰思至三日臣昏耄誠不敢遽對容退而熟審之翌日入對頓首言曰州縣治百姓者也當使身爲百姓者爲之語未竟上曰然事遂寢上爲懷舊詩列五閣臣中稱其神敏剛勁終身不失其正云子二壩堪壩字崇如乾隆十六年進士自編修再遷

侍講二十年統勳得罪並奪埔官下獄事解實編修督安徽學政疏請州縣約束貢監責令察優劣督江蘇學政疏言府縣吏自瞻顧畏刁民畏生監兼畏吏胥聞尤怠玩上嘉其知政體飭兩江總督尹繼善等淬厲除舊習授山西太原知府擢冀甯道以官知府時失察僚屬侵帑發軍臺効力踰年釋還命在修書處行走旋推統勳恩命仍以知府用授江蘇江甯知府有清名再遷陝西按察使丁父憂服闋授內閣學士直南書房遷戶部吏部侍郎授湖南巡撫遷左都御史仍直南書房命偕尙書和珅如山東按巡撫國泰貪縱狀得實授工部尙書充上書房總師傅署直隸總督授協辦大學士五十四年以諸皇子師傅久不入書房降爲侍郎銜尋授內閣學士三遷吏部尙書嘉慶二年授體仁閣大學士命偕尙書慶桂如山東讞獄並按行河決疏請寬濬下游四年加太子少保疏陳漕政僉丁不慎途中盜米致有鑿舟自沈或罵及檣舵舟存而不可用請飭各行省僉丁宜求殷實皆如所議行九年卒年八十五贈太子太保祀賢良祠諡文清埔工書有名於時鑲之統勳次子堪之子也乾隆五十四年進士

自檢討累遷至戶部尙書兼領順天府府尹嘉慶二十二年上自熱河還京師
鑲之入見上以順天府奏事稀捕教匪不時得詰鑲之不能對但言方旱災不
敢怠捕賊上又問振災當設粥廠幾所需米若干鑲之又不能對上降旨責其
玩愒命以侍郎候補復累遷吏部尙書加太子少保道光元年卒諡文恭

論曰明內閣主旨擬承旨撰敕其在唐宋特知制誥之職以王命所出入密勿
獻替遂號爲宰相軍機處制與相類世謂大學士非兼軍機處不得爲眞宰相
勝此任者非以其慎密則以其通敏慎密則不泄通敏則不滯不滯不泄樞機
之責盡矣本世宗舊臣由敦來保綸統勳次第入直由敦左遷而未能直統勳
罷而復入尤以決疑定計見契於高宗許爲有古大臣風亮哉

清史稿

列傳九十

福敏

陳世倌

史貽直

阿克敦

孫嘉淦

梁詩正

福敏字龍翰富察氏滿洲鑲白旗人康熙三十六年進士選庶吉士散館以知縣待銓時世宗在藩邸高宗初就傅命福敏侍讀及世宗卽位擢內閣學士兼禮部侍郎三年遷吏部侍郎出署浙江巡撫四年擢左都御史兼翰林院掌院學士復出署湖廣總督沔陽潛江等十州縣水災疏請發常平倉穀治賑謬紳花苗叛福敏檄貴州兵截後路以湖廣兵搗其巢討平之安陸荊州被水疏請老弱婦女治賑如常而以丁壯修隄俾民得食而隄亦完上眷福敏厚嘗手詔諭曰朕令爾暫攝總督苟得其人卽命往替近日廊廟中頗乏才皇子左右亦待爾輔翼留爾湖廣非得已宜體朕意勉爲之五年召還京授吏部尙書六年以巡撫浙江時徇布政使佟吉圖劾庫銀奪職八年命協理兵部侍郎遷左都

御史十年署工部尚書協辦大學士旋署刑部尚書乾隆三年擢武英殿大學士兼工部尚書翰林院掌院學士四年加太保六年七月高宗初幸木蘭行圍福敏疏言行圍邊外內外章奏按期馳送較宮廷清穆勞逸迥殊宜朝乾夕惕清明在躬從容應之留京百官必因事警察勿使偷惰者得行其私巡行之日言路宜舉大利害不當瑣細瀆陳傷政體聖祖於獵地平易險阻無不了然故周旋中度馳射如神願皇上籌度於先弁兵布圍未必無參差乞少加從容俾阻勉從事弁兵從行日久資斧不繼量加恩澤費無多而惠無窮上諭曰覽大學士所奏老成忠懇補袞陳善朕皆嘉納焉八年疏陳時政言河防事重請如災民請賑例便宜處置以時上聞災民流移情非得已若有司不善拊循徒禁越境致輾轉溝壑宜加以玩視罪江南湖廣偏災請留南漕賑濟定數多寡當出上裁庶上不虧儲下足濟食疏入從之十年以疾乞解任溫詔如所請加太傅二十二年卒年八十四福敏嘗有疾上臨視及聞其卒復親奠賜祭葬祀賢良祠諡文端福敏性剛正廓然無城府直內廷與蔡世遠雷鏞善尤服膺朱軾

既乞休語錄曰此位豈易稱我浮沈其間君不我嗤耶四十四年上製懷舊詩於舊學諸臣皆稱先生字而不名言於軾得學之體於世遠得學之用於福敏得學之基六十年二月上丁釋奠禮成贈福敏太師詔言冲齡就傅時啓迪之力多也

陳世倌字秉之浙江海寧人父誥自有傳世倌康熙四十二年進士改庶吉士自編修累遷侍讀學士督順天學政父憂歸起督江西學政疏乞終制得請二年服闋擢內閣學士出爲山東巡撫時山東境旱蝗糧運淺阻世倌單車周歷密察災輕重吏能否乃視事趣捕蝗略盡並疏治運道世宗書扇以賜世倌疏言社倉通有無濟豐歉古今可行宜令各鄉勸富民輸穀不限多寡量予獎勵舉公正鄉約三人司其出入官爲稽覈貧民春貸秋償石納息二斗歉則減之十年後納息一斗請飭諸行省先就數州縣行之俟有成效然後推廣下所司議行又疏請禁回教上以回教其來已久限於種人非蔓延難量無故欲禁革徒紛擾非治理罷其議又疏上沿海防衛五事報可四年母憂歸命治江南水

利坐遲悞奪職並命赴曲阜督修孔子廟高宗卽位起左副都御史乾隆二年授倉場侍郎再遷工部尙書六年授文淵閣大學士是年秋淮徐鳳泗等處被水上命侍郎周學健會總督高斌比工役世倌屢疏陳行水卹災諸事上卽命乘傳往會學健等察勘世倌言水勢高下必當親勘請以通測量術者偕往從之十二月偕學健等疏陳籌畫工役請待來歲二三月水涸施工上曰世倌臨行奏言歲內可疏積水盡消今疏言仍待來歲二三月其所籌畫皆不過就高斌周學健所定規模而潤色之別無奇謀碩畫何必多此往返乎九年予假回籍請致仕不許疏言道經山東聞有劇盜就逮因案關數省遷延待質劇盜旣鞫得實宜速誅請飭山東巡撫定讞毋使久稽顯戮上題其言假滿還職加太子太保雲南巡撫劾屬吏例當令總督覆讞世倌擬旨誤下吏議奪職上斥世倌卑瑣不稱大學士宜如議奪職又別敕略謂朕斥世倌卑瑣卽如世倌與孔氏有連乃於兗州私營田宅冀分其餘潤此豈大臣所爲今旣奪職下山東巡撫毋令居兗州十五年入京祝嘏賞原銜十六年命入閣辦事兼管禮部事二

十二年以老病乞休詔從其請加太子太傅二十二年春陞辭御製詩賜之謂
皇祖朝臣無幾也資銀五千兩在家食俸未行卒諡文勤世倌治宋五子之學
廉儉純篤入對及民間水旱疾苦必反覆具陳或繼以泣上輒霽顏聽之曰陳
世倌又來爲百姓哭矣雖中被譴訶終亮其端謹其後南巡猶遣官祭其墓云
史貽直字儼茲江蘇溧陽人父夔康熙二十一年進士官至詹事貽直少嫻掌
故三十九年成進士年十九自檢討五遷侍讀學士雍正初命在南書房行走
再遷吏部侍郎歷工部戶部命如河南按總督田文鏡劾信陽知州黃振國等
定讞入告上蔡知縣張球文鏡所嘗薦貽直等發其諱盜下吏議文鏡疏自劾
復命如山西按前總督年羹堯領河東鹽政私其子撓鹽法七年復命如福建
按巡撫朱綱劾按察使喬學尹等並論如律上獎其公當命署福建總督福建
水師巡海挾市易物蝕關稅貽直爲申禁福州興化泉州漳州四府以米少倉
穀不如例糶易貽直請以臺灣應輸兵米易穀運四府以次糶舊存新內地兵
戍臺灣往還擾番社貽直請下臺灣總兵戍兵往還遣裨將檢押皆如所議行

八年調署兩江總督以本籍疏辭勿許授左都御史仍留兩江九年召還時師征準噶爾陝西甘肅當師行道任餽餽命偕侍郎杭奕祿等宣諭化導旋命協理陝西巡撫擢兵部尙書仍留陝西十年署巡撫廷議禁燒鍋下諸行省貽直疏言年豐糧美燒鍋亦民間謀生之一事當視年事豐歉審民力盈虛加以董勸上許爲得因時制宜之意湖廣總督邁柱請疏湖廣荆子關至陝西龍駒寨水道便轉饒貽直疏言荆子關至龍駒寨舊有丹河行兩山間紆折三百七十里夏秋間民引以溉田築堰蓄流涓滴必爭雨後山水驟至絳路輒斷實不宜於輓運臣察湖廣轉饒艱難當於河南府陝州傍河諸州縣積穀行轉般之策浚治丹河宜若可緩上題貽直言格邁柱議不行旋授戶部尙書總理陝西巡撫十三年七月召還八月世宗崩高宗卽位貽直入對高宗出世宗遺念衣賜貽直勛以始終一致貽直泣上亦泣不止貽直疏言科道及吏禮二部宜循舊制用科目官吏遷擢捐棄階資倖進者不以爲公沈滯者不勝其怨宜亦循舊制存階級河南各州縣報墾砂磧山岡按畝升科小民鬻兒女以應輸將州縣

官勸捐有損國體請簡廉明公正大臣撫綏其地則情弊立見事下總理事務王大臣議行尋命署湖廣總督乾隆元年疏言舊制州縣虧倉穀議罪穀一石當銀一兩時值實不及諸雜糧皆視穀尤失平部議米一石當銀一兩穀及諸雜糧皆當銀五錢著爲令武昌城西南當江漢合流處舊有長隄貽直令所司殷勸重築自王惠橋至土城磯隄千三百餘丈期三歲而畢湖廣爲兩淮行鹽地而地錯入川粵凡巴東歸州道州寧遠等九州縣民私食川粵鹽兩淮鹽政尹會一以爲言貽直言湖廣行兩淮鹽歲七十餘萬引諸州縣僻遠兩淮鹽不至強而行之官商且交困部議如貽直奏湖南城步等縣苗曾蒲寅山鳳老一等爲亂貽直與巡撫高其倬等討平之上嘉其勞召還歷工刑兵吏諸部尙書七年命署直隸總督復召還協辦大學士九年授文淵閣大學士十一年加太子太保貽直子奕昂官山東運河道以巡撫鄂昌薦命署甘肅布政使二十年鄂昌坐事籍沒得貽直請託狀上念貽直勤慎不深罪令致仕回籍召奕昂還京二十二年上南巡貽直迎駕沂州令在家食俸尋召還仍授大學士途中病

作遣御醫就視至京命領工部加太子太傅二十五年上以貽直成進士已六十年賜詩獎爲人瑞尋命遇祀典不必隨班行禮以肩輿入直二十七年貽直乞致仕命不必兼攝工部歲加俸五百金二十八年卒年八十二贈太保祀賢良祠謚文靖直貽爲政持大體不苟爲異同性強記飭舉止善爲辭令年羹堯既誅世宗問貽直汝亦羹堯薦耶貽直免冠對曰薦臣者羹堯用臣者皇上及事高宗毫矣嘗奏事拜起舒遲高宗問卿老懃乎貽直對曰皇上到臣年當自知之高宗爲齊顏子奕簪乾隆十年進士官左春坊左贊善奕昂以舉人授刑部員外郎自署甘肅布政使召還京旋授福建按察使再遷兵部侍郎以口語罷奕瓌官山西潞安知府高宗命留京侍貽直授四品京堂

阿克敦字仲和章佳氏滿洲正藍旗人康熙四十八年進士改庶吉士授編修五十二年充河南鄉試考官五十三年上以阿克敦學問優典試有聲名特擢侍講學士五十五年轉侍讀學士五十六年朝鮮國王李焞病日使求空青命阿克敦齋賜之遷解事五十七年擢內閣學士六十一年朝鮮國王李昀請立

其吟爲世弟命阿克敦偕侍衛佛倫充使冊封擢兵部侍郎世宗卽位兼翰林院掌院學士充聖祖實錄副總裁雍正元年命專管翰林院掌院學士充國史會典副總裁復偕散秩大臣舒魯冊封朝鮮國王李吟三年授禮部侍郎兼兵部四年調兵部兼國子監祭酒兩廣總督孔毓珣入覲命阿克敦署總督兼廣州將軍奏劾碣石總兵陳良弼索漁船陋規左翼總兵藍奉以二子冒補把總倚勢累兵上嘉阿克敦實奏命擇勝任之人具本題參高要高明四會三水南海等五縣民瀕江築圩開寶建陂引水溉田謂之圍基江漲多潰決巡撫楊文乾奏請以最衝改石工次衝改椿埽計費數十萬借帑修築且議以開捐補款阿克敦意與相左五年疏言高要等縣沿江圍基俱係土工歲十一月後有司督率鄉民按畝分工加單培薄民不爲苦官無所費江漲不免衝決但水性不猛非必石工椿埽方能抵禦請仍循舊法令有司於農隙督民修補倘江水盛漲道吏巡行防衝決無煩改築費帑上爲寢文乾議尋與毓珣合疏請遣廣南韶道肇高廉羅道督修諸縣圍基報聞蒼梧芋莢山礦民羣聚竊發阿克敦令

捕得其渠上諭嘉之調吏部署廣東巡撫劾肇高廉羅道王士俊侵稅羨上以士俊尙可用命訓飭邊改改署廣西巡撫文乾劾阿克敦聞盜不嚴緝新會縣得盜授意改讞以竊賊詳結侵粵海關耗銀令家人索暹羅米船規禮械珣亦劾侵太平關耗銀六年命奪阿克敦官下械珣文乾會鞠文乾卒上遣通政使留保郎中喀爾吉善會械珣及署廣東巡撫傅泰嚴鞠以諱盜侵耗輕罪不議坐令家人索暹羅米船擬絞士俊復揭告阿克敦庇布政使官達婪贓加擬斬監候七年山東巡撫費金吾以疏濬江南徐州沛縣及濟甯嘉祥諸縣水道請派員督修上命釋阿克敦往江南河工効力自贖九年上命撫遠大將軍馬爾賽率師討準噶爾授阿克敦內閣額外學士協辦軍務十一年命駐扎克拜達里克督餉十二年召還命偕侍郎傅鼎副都統羅密使準噶爾宣諭噶爾丹策零議罷兵息民喀爾喀與準噶爾以阿爾泰山梁分界噶爾丹策零欲以杭愛爲界收阿爾泰山爲游牧地阿克敦與議三日不決噶爾丹策零遣使吹那木喀從阿克敦等詣京師請以哲爾格西喇呼魯烏蘇爲喀爾喀游牧地界十三

年阿克敦等至京師上以阿克敦等奏及地圖密寄北路副將軍策稜令熟籌定議策稜言準噶爾游牧不得令過阿爾泰山議中輟命阿克敦署鑲藍旗滿洲副都統工部侍郎高宗卽位命守護泰陵三年復命阿克敦使準噶爾以待衛旺扎爾台吉額默根爲副齎敕諭噶爾丹策零議界噶爾丹策零使哈御從阿克敦等詣京師請準噶爾游牧不越阿爾泰山而乞移布延圖托爾和二卡倫入內地上謂游牧不越阿爾泰山已可定議而移二卡倫不可許命哈御齎敕還授阿克敦工部侍郎五年調刑部復調吏部八年授鑲藍旗滿洲都統十年兼翰林院掌院學士十一年授刑部尙書十三年命協辦大學士尋解以授傅恒四月翰林院進孝賢皇后冊文清文譯皇妣爲先太后上以爲大誤召阿克敦詢之阿克敦未候旨已退上怒謂阿克敦以解協辦大學士故怨望奪官下刑部當大不敬律擬斬監候六月命在內閣學士上行走署工部侍郎七月擢署刑部尙書授鑲白旗漢軍都統十月兼翰林院掌院學士十二月復命協辦大學士十四年金川平加太子少保連歲上幸木蘭幸河南幸盛京皆命留

京辦事迭署左都御史步軍統領二十年以目疾乞假上遣醫視疾屢乞休命致仕二十一年卒賜祭葬諡文勤子阿桂自有傳阿克敦居刑部十餘年平恕易簡未嘗有所瞻顧一日阿桂侍阿克敦曰朝廷用汝爲刑官治獄宜何如阿桂曰行法必當其罪罪一分與一分法罪十分與十分法阿克敦怒索杖阿桂惶恐求教阿克敦曰如汝言天下無完人矣罪十分治之五六已不能堪而可盡耶且一分罪尙足問耶阿桂長刑部屢舉以告僚屬云

孫嘉淦字錫公山西興縣人嘉淦故家貧耕且讀康熙五十二年成進士改庶吉士授檢討世宗初卽位命諸臣皆得上封事嘉淦上疏陳三事請親骨肉停捐納罷西兵上召諸大臣示之且曰翰林院乃容此狂生耶大學士朱軾侍徐對曰嘉淦誠狂然臣服其膽上良久笑曰朕亦且服其膽擢國子監司業四年遷祭酒命在南書房行走六年正月署順天府府尹丁父憂服未闋召還京仍授府尹進工部侍郎仍兼府尹祭酒十年調刑部侍郎尋兼署吏部侍郎嘉淦爲祭酒薦其弟揚淦爲國子監丞教習宋鐔方從仁等期滿引見嘉淦言鐔等

皆可用上詰之又言從仁實不堪用上乃大怒斥嘉淦反覆欺罔奪職交刑部治罪當挾詐欺公律擬斬上語諸大臣曰係嘉淦太愍然不愛錢命免罪在戶部銀庫効力行走嘉淦出獄徑詣庫果親王允禮時領戶部疑嘉淦故大臣被黜不屑會計事又聞蜚語謂嘉淦沽名收銀皆不足乃莅視嘉淦方持衡稱量與吏卒雜坐均勞苦詢所收銀則別置一所覆之無絲毫贏細事上聞上愈重嘉淦十二年命署河東鹽政十三年八月高宗卽位召嘉淦來京以待郎候補九月授吏部侍郎十一月遷都察院左都御史仍兼吏部嘉淦以上初政春秋方盛上疏言臣本至愚荷蒙皇上聖恩畀以風紀重任日夜悚惶思竭一得之慮而每月以來捧讀聖訓剴切周詳仁政固已舉行臣愚更無可言所欲言者皇上之心而已皇上之心仁孝誠敬明恕精一豈復尙有可議而臣猶欲有言者正於心無不純政無不善之中竊總總私憂過計而欲預防之也治亂之循環如陰陽之運行陰極盛而陽生陽極盛而陰妬事當極盛之地必有陰伏之機其機藏於至微人不能覺及其既著積重而不可返此其間有三習焉不可

不慎戒也主德清則臣心服而頌仁政行則民身受而感出一言而盈廷稱聖發一令而四海謳歌在臣民本非獻諛然而人主之耳則熟於此矣耳與譽化非譽則逆始而匡拂者拒繼而木納者厭久而頌揚之不工者亦絀矣是謂耳習於所聞則喜諛而惡直上愈智則下愈愚上愈能則下愈畏趨踰諂脅顧盼而皆然免冠叩首應聲而卽是此在臣工以爲盡禮然而人主之目則熟於此矣目與媚化非媚則觸故始而倨野者斥繼而嚴憚者疏久而便辟之不巧者亦忤矣是謂目習於所見則喜柔而惡剛敬求天下之事見之多而以爲無足奇也則高己而卑人慎辨天下之務閱之久而以爲無難也則雄才而易事實之人而不聞其所短返之己而不見其所失於是乎意之所欲信以爲不踰令之所發概期於必行矣是謂心習於所是則喜從而惡違三習既成乃生一弊何謂一弊喜小人而厭君子是也今夫進君子而退小人豈獨三代以上知之哉雖叔季之君孰不思用君子且自智之君各賢其臣孰不以爲吾所用者必君子而決非小人乃卒之小人進而君子退者無他用才而不用德故也德者

君子之所獨才則君子小人共之而且小人勝焉語言奏對君子訥而小人佞
諛則與耳習投矣奔走周旋君子拙而小人便辟則與目習投矣卽課事考勞
君子孤行其意而恥於言功小人巧於迎合而工於顯勤則與心習又投矣小
人挾其所長以善投人主溺於所習而不覺審聽之而其言入耳諦觀之而其
顏悅目歷試之而其才稱乎心也於是乎小人不約而自合君子不逐而自離
夫至於小人合而君子離其患可勝言哉而揆厥所由皆三習爲之蔽焉治亂
之機千古一轍可考而知也我皇上聖明臨御如日中天豈惟並無此弊抑且
並無此習然臣正及其未習也而言之設其習旣成則或有知之而不敢言抑
或言之而不見聽者矣今欲預除三習永杜一弊不在乎外惟在乎心故臣願
言皇上之心也語曰人非聖人孰能無過此淺言也夫聖人豈無過哉惟聖人
而後能知過惟聖人而後能改過孔子謂五十學易可無大過文王視民如傷
望道如未之見是故賢人之過賢人知之庸人不知也聖人之過聖人知之賢
人不知也欲望人繩愆糾謬而及於其所不知難已故望皇上聖心自懷之也

反之已真知其不足驗之世實見其未能故常欲然不敢自是此不敢自是之意流貫於用人行政之間夫而後知諫爭切磋愛我良深而諛悅爲容者愚己而陷之阱也夫而後知嚴憚匡拂益我良多而順從不違者推己而墜之淵也耳目之習除取舍之極定夫而後衆正盈朝太平可觀矣不然自是之根不拔則雖斂心爲愼愼之久而覺其無過則謂可以少寬厲志爲勤勤之久而覺其有功則謂可以少慰此念一轉初亦似於天下無害而不知嗜欲蕪安功利之說漸入耳而不煩而便辟善柔便佞者亦熟視而不見其可憎久而習焉或不自知而爲其所中則黑白可以轉色而東西可以易位所謂機伏於至微而勢成於不可返者此之謂也大學言見賢而不能舉見不賢而不能退至於好惡拂人之性而推所由失皆因於驕奢驕泰卽自是之謂也由此觀之治亂之機轉於君子小人之進退進退之機握於人主之一心能知非則心不期敬而自敬不見過則心不期肆而自肆敬者君子之招而治之本也肆者小人之媒而亂之階也然則沿流溯源約言蔽義惟望我皇上時時事事常守此不敢自是

之心而天德王道舉不外乎此矣疏上上嘉納宣示遷刑部尙書總理國子監事河南鄭州有疑獄命使者往勘仍不得實上命嘉淦往訊得其冤狀十餘人盡脫之三年四月遷吏部尙書仍兼管刑部事九月直隸總督李衛劾總河朱藻貪劣誤工命偕尙書訥親往鞠得實論如律十月授直隸總督時畿輔酒禁甚嚴罹法者衆嘉淦疏言前督李衛任內一年中獲私釀三百六十四案犯者千四百餘名臣抵任一月獲私釀七十八案犯者三百五十餘名此特申報者耳府廳州縣自結之案尙復不知凡幾吏役兵丁已獲而賄縱者更不知凡幾此特犯者之正身耳其鄉保鄰甲沿途店肆負販之屬牽連受累者又復不知凡幾一省如是他省可知皇上好生恤刑命盜案自罹重辟尙再三酌議求一緩可原之路今以日用飲食之故官吏兵役以私釀爲利較百姓弱者失業強者犯令鹽梟未清酒梟復起天下騷然殊非政體臣前言酒禁宜於歉歲不宜於豐年猶屬書生謬論躬莅其事乃知奪民之貲財而狼藉之毀民之肌膚而敲撲之取民之生計而繫錮之饑饉之餘民無固志失業旣重何事不爲歉歲

之不可禁乃更甚於豐穰周禮荒政舍禁去譏有由然也且也酒禁之行無論適以擾民而實終不能禁借令禁之不擾且能永禁而於貧民生計米穀蓋藏不惟無益抑且有損夫作酒以糜穀此爲黃酒言也其麴必用小麥其米則需稷粳皆五穀之最精若燒酒則用高粱佐以豆皮黍穀穀糠麴以大麥爲之本非朝夕所食而豆皮黍穀穀糠之屬原屬棄物雜而成酒可以得價其糟可飼六畜化無用爲有用非作無益害有益也今欲禁燒酒而並禁黃酒則無以供祭祀賓客養老之用若不禁黃酒止禁燒酒省大麥高粱之粗且賤者而倍費小麥稷粳之精且貴者臣所謂無益於蓋藏也百工所爲皆需易之以粟太貴則病末太賤則傷農得其中而後農末俱利故農有歉荒亦有熟荒十年以內歉歲三而豐歲七則粟宜有所洩非但積之不用而已今北地不種高粱則無以爲薪蓆屋牆之用種之而用其穉稈則其顆粒宜有所售燒鍋既禁富民不買高粱貧民穫高粱雖賤價而不售高粱不售而酒又爲必需之物則必買米穀以買黃酒向者一歲之內八口之家賣高粱之價可得七八兩今止二三兩

矣而買黃酒之價則需費七八兩所入少而所出多又加以批發等物堆積而不能易錢自然之利皆失日用所需惟糶米麥糶而售則家無蓋藏糶而不售則百用皆絀臣所謂有損於生計者此也小民趨利如水就下利所不在雖賞不爲利之所在雖禁彌甚燒鍋禁則酒必少酒少則價必貴價貴而私燒之利什倍於昔什倍之利所在民必性命爭焉孟子曰君子不以所養人者害人本爲民生計而滋擾乃至此則立法不可不慎也疏上詔弛禁民王宰謀得諸生馬承宗產賄太監劉金玉等投獻貝勒允祐門下嘉淦疏請交刑部具讞上嘉其能執法民焦輅被誣坐邪教株連者數百人嘉淦白其枉民紀懷讓食料豆汁染衣會村有賊殺人偵者以爲血誣服決有日正定知府陳浩廉得冤狀嘉淦親鞠雪懷讓尋命兼管直隸河工嘉淦議治永定河初至官卽請於金門閘上下多建草壩使河流漸復故道四年正月復疏請於金門閘下增設草壩一引永定河歸故道自中亭玉帶達天津歸海得旨借總河顧琮悉心經理嘉淦復疏言天津南北運河與淀河會於西沽以入於海河南運河水濁久必淤墊

況通省之水皆匯於此秋潦時至宣洩不及大學士鄂爾泰曾奏准於靜海獨流疏引河實下游治水之關鍵但開河易達海難設中途梗阻必更漫溢爲患且海口開深又恐潮水倒灌臣等見勘通省水道凡衆河交會及入淀入海之路有急宜修濬者卽於今夏興修報聞五月晉太子太保五年九月疏言直隸經流之大者永定子牙南運北運四河與東西兩淀治永定河擬於葉淀之東疏引河由西沽北入海治子牙河擬濬新河引上游諸水入淀開舊河東隄使漸由西沽南入海治北運河兩岸去沙截直濬減河培隄岸治南運河兩岸築遙隄濬河使行正溜安陵鎮建閘濬減河三十餘里入老河口達於海治西淀擬開白溝河故道以入中亭九橋南別疏一河並濬清門河別派分流下游已暢達復將金門閘西引河改由東道於苑家口疊道建木橋五使漑水通行治東淀擬濬上游三岔河令寬深楊家河下家河窪諸處疏引河並行而東會於西沽庶使四河順軌兩淀暢泄又引永定河改歸故道各工俱全上嘉之時江南總督高斌入都上命會同嘉洽議河務十月合疏言永定河當於固安南新

州北順流東下接東淀達西沽入海則上游漲水自消霸州北當築隄護城保定縣西新莊至城東路隄村隄根逼溜應加寬厚其路隄村東至艾頭村接管田園埝約五十餘里擬築月隄作重障嘉淦方銳意引永定河歸故道河溢傍河諸州縣被水六年正月諭曰朕聞永定河經理未善固安良鄉涿州雄縣霸州諸州縣田畝往往被淹係嘉淦不能辭其責也於是命大學士鄂爾泰蒞勘請暫塞金門閘上游放水口嘉淦奏旋開旋築實與放水本意相左將來泥沙壅入玉帶恐爲患更大諭曰此奏固是然鄂爾泰慎重欲籌萬全卿不必固執己見卿此事自任甚力而料理未善朕不能爲卿諱然朕終以卿爲是者不似顧琮爲游移巧詐之計耳其後上巡天津閱中亭河工賦詩紀事猶病嘉淦之失計也是年八月調湖廣總督七年五月疏言內地武弁不得干預民事苗疆獨不然文員不敢輕入閭閻但令差役催科持票滋擾而已爭訟規殺之案皆委之於武弁威權所及攤派隨之於是因公科歛文武各行其令因事需索兵役競逞其能甚至沒其家貲辱及婦女苗民不勝其忿與之併命而嫌辭遂成

爲大吏者或剿或撫意見各殊行文查勘動經數月苗得聞風豫備四處勾連飲血酒傳木刻亂起甚易擬定實難幸就削平而後之人仍蹈前轍搜捕株連滋擾益甚苗搖無所告訴乘隙復動惟力是視歷來治苗之官旣無愛養之道又乏約束之方無事恣其侵漁有事止於剿殺剿殺之後仍事侵漁侵漁旣久勢必又至剿殺長此循環伊於胡底語曰善爲政者因其勢而利導之苗人散居各有頭人凡作奸窩匪之處兵役偵之而不得者頭人能知之門爭刼殺之事官法繩之而不解者頭人能調之故治苗在治頭人令各寨用頭人爲寨長一崗之中取頭人所信服者爲崗長使各約束寨長而聽於縣令衆苗有事寨長處之不能以告崗長又不能以告縣令如是則於苗疆有提綱繫領之方於有司自收令行禁止之效且崗長數見牧令有爭訟可告官區處而無仇殺之舉牧令數見崗長有條教可面飭遵行而無吏役焚敲之患擾累旣杜則心志易孚所謂立法簡易因其俗而利導者也八年正月命署福建巡撫未赴湖南糧道謝濟世勅善化知縣樊德貽衡陽知縣李澎浮收漕米巡撫許容庇德貽

等疏劾濟世下嘉淦察讞長沙知府張琳按衡陽丁役得浮收狀申署糧道倉德布政使張聚致書倉德請易府牒倉德持不可以其實揭報嘉淦及漕運總督顧琮嘉淦欲寢其事而顧琮以上聞御史胡定復論劾倉德又揭都察院上遣侍郎阿里賓往按直濟世上責嘉淦徇庇奪官責修順義城工九年授宗人府府丞十年遷左副都御史十二年以老乞休許之十四年召來京直上書房十五年正月授兵部侍郎八月擢工部尙書署翰林院掌院學士十七年進吏部尙書協辦大學士十八年十二月卒年七十有一諡文定嘉淦居官爲八約曰事君篤而不顯與人共而不驕勢避其所爭功藏於無名事止於能去言刪其無用以守獨避人以清賈廉取用以自戒旣以直諫有聲乾隆初疏匡主德尤爲時所慕四年京師市井傳嘉淦疏稿論劾大學士鄂爾泰張廷玉等高宗諭步軍統領巡城御史嚴禁十六年或又傳嘉淦疏稿斥言上失德有五不可解十大過雲貴總督碩色以聞命求所從來遣使者督讞轉相連染歷六省更三歲乃坐江西衛千總盧魯生僞爲罪至死高宗知無與嘉淦事眷不替嘉淦

益自抑嘗著書述春秋義自以爲不足燬之子孝愉以廕生授刑部主事官至直隸按察使

梁詩正字養仲浙江錢塘人雍正八年進士及第授編修累遷侍講學士十三年以母憂歸高宗卽位召南書房行走乾隆三年補侍讀學士累遷戶部侍郎詩正疏言八旗除各省駐防與近京五百里俱聽屯種餘並隨旗駐京皇上爲旗人資生計者委曲備至而旗人仍不免窮乏蓋生齒日繁若不使自爲養而常欲官養之勢有不能臣謂非屯田不可今內地無間田興盛二京膏腴未盡闢世宗時欲令黑龍江甯古塔等處分駐旗人耕種已有成議未及舉行今不早爲之所數百年後旗戶十倍於今以有數之錢糧贍無窮之生齒使取給於額餉之內則兵弁之關支不足供閒散之坐食使取給於額餉之外則民賦不能加國用不能缺戶口日繁待食者衆無餘財給之京師亦無餘地處之惟有酌派戶口散列邊屯使世享耕牧之利以時講武亦以實邊諸行省綠營馬步兵餉較康熙年間漸增至五六百萬在各標營鎮協每處浮數十百名不覺其

多在朝廷合計兵餉則先額歲不下數十百萬各省錢糧大半留充兵餉其不敷者隣省協撥而解部之項日少向來各營多空糧自雍正元年清查此弊盡除是近年兵額但依舊制已比前有虛實之別况直省要害之地多滿洲駐防與各標營鎮協聲勢聯絡其增設兵額可以裁汰者宜令酌定數目遇開除空缺卽停止募補庶將來營制漸有節省而見在兵丁無苦裁汰十年擢戶部尙書詩正疏言每歲天下租賦以供官兵俸餉各項經費惟餘二百餘萬實不足備水旱兵戈之用今雖府庫充盈皇上宜以節儉爲要勿興土木之工黷武之師庶以持盈保泰十三年調兵部尙書十四年加太子少師兼刑部尙書翰林院掌院學士協辦大學士十五年調吏部尙書御史歐堪善疏劾詩正徇庇行私上召諸大臣及堪善廷詰所劾皆無據惟翰林院輪班引見偶有越次上諭曰梁詩正職在內廷不過文學供奉朕何如主而謂諸臣能恣行其胸臆乎至小小瞻徇私情則不獨詩正諸大臣恐俱未能盡絕如張廷玉掌院三十年引見越次不知凡幾何以未聞論劾詩正有此一二可議卽被論劾得以知所做

省未始非福堪善之言當以爲感不當以爲怨也會御史儲麟趾劾四川學政朱荃匿喪上詢詩正詩正對失指下吏議當奪職命留任十六年從上南巡詩正父文濂年八十予封典十七年疏乞終養二十三年丁父憂召署工部尙書二十四年調署兵部尙書二十五年服闋真除仍命協辦大學士兼翰林院掌院學士二十八年授東閣大學士加太子太傅尋卒諡文莊子同書舉人賜進士官至翰林院侍讀敦書官至兵部右侍郎

論曰福敏以謹厚爲高宗師世伯貽直立朝有風節雖坐譴皆近私大德不踰卒不以相掩阿克敦倬大而清介嘉淦譔陳善閉邪一朝推名疏詩正論八旗當行邊屯綠營當停募補掌國計雖歲有餘愴愴惟懼不足其慮遠矣